



元書卷六十九

李秉彝賈居貞張昉袁裕燕公楠干奴吳元珪朵兒赤王都中張昇韓鏞列傳第四十四

邵陽曾廉撰

國朝

李秉彝字仲常通州潞人也父瑀任金爲懷遠大將軍秉彝幼穎悟好學年二十餘謁行省粘合南合以爲掾屬遷都事說南合曰金亡人才無所附麗天下初定宜拔其尤者爲朝廷用南合因首聘王磐授子弟經於是士大夫相繼登粘合之門自秉彝致之也時山東參議王文統投書南合請立河南省曰距河以持南北之勢聚財以結上下之交可以成事秉彝明其邪說願勿聽文統果敗遷員外郎世祖以潛藩伐宋至鄂將士爭入孟珙家取金帛秉彝獨收書萬卷還中原兵火後人少藏書學者皆詣秉彝借讀焉

轉郎中遷彰德宣課運使擢戶部侍郎出爲都提舉漕運使臺察廉能授陝西按察副使巡行灌州修李公堰用其舊法以利蜀民除江州路總管屬邑有剽掠者有司以叛告官軍旣動被俘者眾秉彝邀諸津詰釋者千餘人黃州叛九江卒僅五百商旅亦授兵登陴呂師龍新降爲招討使擁精騎千數百秉彝使捍禦不聽夜登庾樓望小舟順流下邏獲七人自黃來者持書期師龍以五月十六日爲內應秉彝卽訪其計議陳文彬偕見師龍諭以利害師龍自誓不知情秉彝曰然則何不分兵守城師龍卽從之江州遂靖旣其兄師夔自江西以黃金二百白金二千兩奴婢十人爲壽卻不受義門陳氏苦縣令貪酷戕其吏卒秉彝曰非叛也密遣其姻黨招撫之閤族千餘口得免遷總管湖州又徙常德沅江泛溢立隄置以制激湍又官種柑橘五百株以代民貢郡人立碑爲頌

擢兩浙轉運使除工部尙書復還兩浙兼杭州諸色課程及市舶前同知刺速納丁倚桑哥勢奪秉彝職有旨理算欲因以誣之卒不得毫髮私歸道鎮江卒秉彝屢典金穀而不以自污南北多所振貸全活無算所至皆以延聘名儒講學矜式士民爲務或求爲吏以大小蘇公手書奏議三十冊獻秉彝曰此非賂乎平日常戒子孫曰凡物之罕得者有之必奇禍也嘗自名其齋曰閑邪人遂稱爲閑邪公云

賈居貞字仲明真定獲鹿人也其先居沃州祖益謙金尙書左丞傳在金史父頤卿以門資入仕早卒沐京破居貞年十五奉母居東平甫冠爲行臺從事時多以賄交或餽黃金五十兩居貞卻之太宗聞而嘉之敕有司月給白金百兩以旌其廉世祖在潛邸知其賢召監築上都城以喪歸中統元年授中書左右司郎中從帝

北征軍中每陳說資治通鑑一日帝問郎俸幾何居貞以數對帝謂其太薄敕增之居貞對曰品秩宜然不可以臣而紊制劉秉忠奏居貞爲參知政事又辭曰他日必有郎官援例求執政者將何以處之不拜至元元年參議中書省事詔與左丞姚樞行省河東山西罷侯置守五年仍爲郎中爲阿合馬所忌改給事中同纂修國史丞相伯顏伐宋居貞以宣撫使議行省事鄂漢旣降伯顏以大軍東下留右丞阿里海牙與居貞行省鎮之居貞曰江陵要地宋制闔重兵所屯聞諸將不睦遷徙之民復多疾疫芻蕘乏闕杜門不敢樵采不乘隙先取迨春水漲上流爲彼所乘則鄂危矣阿里海牙以聞明年阿里海牙往取江陵居貞留鄂僉行省事於是發倉廩振流亡廩宋宗室子孫不變其服而行其楮幣東南未下州郡商旅流滯者給引歸之免括商稅並湖荻禁造舟百數艘駕

以水軍不致病民一方安之婁安邦以信陽來歸遣入覲裨將陳思聰屠其家居貞以計召思聰誅之宋二王立於閩廣民爭應之張德興遂據司空山連失黃州壽昌宣慰使鄭鼎戰死敵軍聲言攻陽邏堡鄂中大振時參知政事忽都帖木兒畏其鋒不敢出師居貞激趣之遂大破其眾初行省聞變欲盡殺南人在鄂者居貞救之未能得至是事平被執者皆釋之累遷江西參知政事鄂人刻其像祠之泮宮是時江西逋逮民間受二王文帖者甚急坐繫巨室三百餘居貞至悉出之而投其文帖於火痛繩士卒之誣人取財者親帥師平南安李梓發之亂十七年朝廷征日本造戰艦於江南居貞以民困欲入朝奏論其事未行而卒後贈推忠輔義功臣銀青榮祿大夫中書平章政事定國公諡曰文正子鐸淮東宣慰使鈞字元播仁宗時官至參知政事

張昉字顯卿東平汶上人也父汝明金大安進士官至治書侍御史昉性縝密確然有守以任子試補吏部令史金亡還鄉里嚴實行臺東平辟爲掾鄉人有左道惑眾謀不軌者事覺逮捕誣誤甚眾諸僚佐莫敢言昉獨別白出數百人實才之進幕職時兵後吏曹雜進不習文法東平民眾事繁簿書填委漫無統紀昉坐曹躬閱案牘左酬右答事無留滯初有將校死事以弟襲職至是革去昉辯明復之持金夜饋昉昉卻之慙謝而去同里張氏以絲五萬兩寄昉家而他適俄而被火家人惶駭走避費用悉焚昉力完張氏絲歸焉憲宗五年命權知東平府事以疾辭家居養母中統時商挺鎮巴蜀表爲四川行樞密院參議至元初入爲中書左右侍郎中甄別能否人無怨言制國用司建轉爲司郎中制司專職財賦阿合馬領之倚集任事尤號煩重昉竭誠贊畫出納惟謹期於

不加賦而濟國用然阿合馬貪橫未能如志也居數年轉尙書左右司郎中既又復入中書昉有識慮損益古今裁定典憲時皆宜之名爲稱職十一年拜兵部尙書上書乞骸骨致仕卒贈中奉大夫參知政事東平郡公諡曰莊憲子克適位平陰縣尹孫振秘書著作郎揆中書左司都事同時臺城楊湜彥清積官至戶部侍郎燕人吳鼎鼎臣歷省京畿漕運使宣徽使崇祥使皆號爲心計精析時論經費者咸推其能而執法平允意在惠民鼎方爲保定總管時武宗皇太后欲幸五臺言者請開保定西五回嶺以取捷徑鼎言荒山斗入人迹久絕非乘輿所宜往還遂寢其役尤爲人所稱道云

袁裕字仲寬河南洛陽人也幼孤從兄避難聊城因家焉稍長嗜學中統初爲聊城縣丞辟中書右司掾始建言給重囚衣糧醫藥

元書 卷六十九  
毆人至死者免籍其孥產止令出焚瘞錢後著爲令順天路民王  
住兒因鬪誤殺人其母年七十言於朝曰妾寡且老恃此兒以爲  
生兒死則妾亦死矣裕言於執政曰因誤殺人情非故犯當矜其  
母宥之執政以聞帝從之囚得免死南京總管劉克輿掠良民爲  
奴隸後以矯制伏罪當籍孥產之半裕言於中書止籍其家奴隸  
得復爲民者數百至元六年遷開封府判官洧川縣達魯花赤貪  
暴盛夏役民捕蝗禁不得飲水民不勝忿擊之而斃有司當以大  
逆寘極刑者七人連坐者五十餘人裕曰達魯花赤自犯眾怒而  
死安可悉歸罪於民議誅首惡一人餘各杖之有差部使者錄囚  
至縣疑其太寬裕辯之益力遂陳其狀刑曹竟從裕議八年拜監  
察御史尋授西夏中興等路新民安撫副使時徙鄂民萬餘於西  
夏有司雖與廩食而流離顛沛猶多裕與安撫使獨吉請計丁給

地立三屯使耕以自養官民便之又言西夏羌渾雜居莠良莫辯  
宜驗已有從良書者則爲良民從之得八千餘人官給牛具使力  
田爲農十三年進甘州宣撫副使仍兼中興原使明年移鎮甘州  
十八年遷知南陽府明年召拜刑部侍郎復出爲順德路總管郡  
有鐵冶提舉張鑑無子買妾其妻妒而殺之裕捕訊之伏辜裕用  
法平允而疾惡不少貨如此二十一年卒官裕以其兄有鞠育之  
恩令其子師愈推蔭兄子仁師愈後仕至侍御史

燕公楠字國材南康建昌人也宋禮部侍郎肅七世孫也母夢五  
色巨翼入幃而生甫十歲能屬文居父喪廬墓三年再貢於鄉不  
第後以連帥辟五遷至贛州通判國兵平江南帥臣版授同知贛  
州事召至上都賜名賽因囊加帶累除江淮行省僉事江淮在宋  
爲邊陲故多曠土公楠請置兩淮屯田勸道有方田日益墾遂以

大司農使領八道勸農營田事按行郡縣劾江西營田使沙不丁貪橫罷之尋參知江淮政事桑哥既敗蠹政未盡革公楠入覲極陳其弊請更張以固國本且言近制歲終各行省赴闕奏事宜令行臺並赴統奏一歲舉刺之數世祖從之著爲令會欲易政府大臣帝以問公楠公楠以完澤安童對相位遂定事在完澤傳中改參知浙江政事復爲行大司農奏言杭州上海澈浦温州慶元廣東泉州置市舶司凡七惟泉州貨物三十取一餘皆十五抽一乞以泉州爲定制仍併温州市舶入慶元杭州市舶入稅務商民深德之元貞時進湖廣右丞轉運判官唐申家沅州豪橫奪民田武昌尹劉權殺主簿而誣繫其妻子悉正以罪俄召還朝卒帝爲之傷悼遣官護喪南歸公楠著述在藝文志

千奴玉耳別里伯牙吾台部族也曾祖哈刺察率所部歸太祖祖忽都思從戰三峯山以功賜號拔都兒授管軍百戶後從攻漢上鐵城寨歿於軍贈竭忠宣力功臣資德大夫上護軍沈國公諡武愍父和尚襲職從世祖攻鄂後從平濟南及攻襄陽皆有功大軍伐宋渡江和尚從右丞阿里海牙攻拔岳州進取沙市諭降江陵復從下澧州破靜江累擢常德路達魯花赤擢嶺南廣西道提刑按察使劾責阿里海牙特功驕恣不少貸時人重其不阿遷按察江南浙西道卒官後贈宣忠守正功臣司徒銀青榮祿大夫上柱國沈國公諡莊肅千奴以御史大夫玉昔帖木兒薦入見世祖卽授以父官浙西按察使時江浙行省江南行臺皆治杭千奴上言行省專控江浙在杭宜也行臺所轄廣而偏在杭非便且兩大府並立勢偏則事窒情通則威褻不如移臺後數年遂移建康議始自千奴也既又遷山南湖北道提刑按察使徙淮西江北桑哥竊

政人莫敢言自徹里發其姦千奴入朝見帝於柳林亦極陳其罪狀帝益大悟桑哥遂伏法改江東建康道肅政廉訪使東平大名諸路有諸王牧馬草地與民地相閒互相侵冒有司視強弱爲子奪連歲爭訟不決乃命千奴往治之其訟遂息成宗嗣位奉詔使淮東西問民疾苦察官吏能否還奏軍民便宜三十事多見采用復歷江西湖東江南湖北廉訪使時平章政事伯顏段貞等徇情植黨軌法弄權千奴撫其實上於憲臺以聞而御史杜肯構並言太傅右丞相完澤及伯顏等俱受朱清張瑄賄賂帝爲原完澤而黜伯顏段貞諸人事已具成宗本紀千奴前後七持憲節剛正不撓聞朝廷事有不便必上章極論未嘗以內外爲嫌俄遷大都路總管兼大興府尹馭吏民有方以暇日正街衢表里巷國學興工尤爲盡力進同僉樞密院事上疏言蒙古軍在山東河南者往戍

甘肅跋涉萬里自備裝囊鞍馬行必驚田產甚則賣妻子戍者未歸代者當發前後相仍困苦日甚請以近甘肅之兵戍之而山東河南前戍者官爲贖田產妻子庶使少有瘳也從之武宗立命參議中書省事拜平章政事商議樞密院事賜玉帶仁宗時致仕退居濮上築先聖宴居祠堂於歷山下聚書萬卷延名師教其鄉里子弟出私田百畝贍之有司以聞賜額歷山書院家居七年泰定二年卒贈推忠輔治功臣光祿大夫河南江北平章政事上柱國衛國公諡景憲子曰龍寶監察御史曰壽童洪澤屯田萬戶曰不蘭奚南臺御史曰觀音保亦洪澤屯田萬戶曰伯顏忽都起進士知鄭州以治最入爲翰林國史院經歷

吳元珪字君璋廣平人也父鼎燕南提刑按察副使元珪簡重好深沈之思至元十四年世祖召侍左右授後衛經歷佩金符數歲

從幸上都命取御藥於大都萬歲山元珪乘傳未盡一晝夜而至  
帝奇其速擢樞密院經歷嘗從同知樞密院事暗伯進西番鎧甲  
帝問其制度元珪對甚詳帝益奇之是時江南初定樞密奏裁定  
官屬京師五衛行省萬戶府設官有差均俸祿給醫藥設學校置  
屯田多元珪所論建命參議樞密院事會繕修宮城尙書省奏役  
軍士萬人留守司主之元珪亟陳其不便乃立武衛繕理宮城以  
留守段天祐兼都指揮使凡有興作必以聞於樞府進本院判官  
歷禮部侍郎左司郎中參議中書省事大德元年除吏部尙書時  
選曹銓注多有私其鄉里者元珪曰此風不可長蜀朔黨之興宋  
所由衰也請謁悉皆謝絕宣撫燕南歸遷工部尙書河朔連年水  
旱元珪言春秋之義以養民爲本凡用民力者必書蓋民力息則  
生養遂生養遂則教化行而風俗美宰相用其言土木之工稍息

出參知江浙政事初朱清張瑄以財連結當路及誅死錄其家具  
籍所交諸公貴人江浙省臣爲多惟元珪一無所污武宗初拜樞  
密副使詔議政中書條上惜民力嚴選舉節財用定律令謹賞罰  
建科舉課農桑汰冗員易封贈皆切世務先是詔發軍萬人屯田  
稱海以實邊海都之亂被俘者眾至是頗有來歸者饑寒不能存  
至嚮子以活元珪具其事以聞詔賜錢贖之加平章政事賜白金  
及質孫衣四襲仁宗嗣位詔議朝政出拜江浙左丞江淮漕臣言  
江南殷富蓋由多置腴田若再行檢覈之法當益田畝累萬計元  
珪曰江南之平幾四十年戶有定籍田有定畝一有動搖其害不  
細執其論固爭月餘不能止移疾去逾二歲拜甘肅左丞歲餘召  
還命宣撫遼陽復爲樞密副使召見嘉禧殿賜貂裘二襲元珪奏  
曰昔世祖限田四百畝以給軍需餘田悉供賦稅今經理田土第

以增多爲能加以有司頭會箕斂元元之民困苦日甚臣恐變生不測非國之福也帝命並遵舊制英宗立元珪與知樞密院事帖木兒不花復條上軍民利弊十餘事大略言諸王近侍不可干軍政管軍官吏不可漁取軍戶軍官有才當遷有司賦役當均而軍民不可偏軍官襲職惟傳適嗣而支庶不可亂並見施行以年老致仕起商議中書省事至治三年卒累贈推誠佐理功臣光祿大夫司徒河南平章政事柱國趙國公諡忠簡

朵兒赤字道明西夏甯州人幹氏唐兀貴族也曾祖幹道冲爲夏宰相父曰幹札篲以西涼降於太祖爲中興路副管民官國兵西征常運餉不絕無毫髮私號曰滿朝清世祖初歲卒遺奏因高智耀以進請謹名爵慎財用帝嘉納焉朵兒赤年十五通古注論語孟子尙書帝以西夏子弟多俊逸欲試用之召見於香閣帝曰朕

聞儒者多嘉言朵兒赤對曰陛下聖明仁智奄有四海惟當親君子遠小人耳自古帝王未有不以小人而亡者惟陛下察焉帝曰朕於廷臣有忠言雖戇未嘗不悅而受之違忤者亦未嘗罪蓋欲養忠直而退諛佞也因亟獎之而問欲何仕對曰西夏屯田實占正軍倘有調用則又妨耕作故土瘠野曠十未墾一南軍屯聚以來子弟蕃息若以其成丁者別編入籍以實屯戶則地利多而兵有餘矣請爲其總管以盡措畫乃授中興路新民總管朵兒赤錄其子弟之壯者墾田塞黃河九口開其三流凡三載賦額增倍就轉營田使秩滿入覲帝大悅拜潼川府尹時公府無祿田朵兒赤乃以官曠地給民視秩分畝而薄其稅潼川仕者有祿自此始大德中遷雲南廉訪副使值雲南諸蠻叛僚佐悉去朵兒赤獨居守又八月省臣大懼歸符印欲遁朵兒赤乃白於梁王得檄而後行

徙山南至大時復遷雲南廉訪使是時行省丞相鐵木迭兒貪暴擅殺羅織安撫使法花魯丁將置於極刑朵兒赤曰生殺之柄天子所操也汝以方面之臣而專殺意將何爲小民罹法且必審覆況朝廷之臣乎法花魯丁由是獲免尋復其官焚夷與蠻相仇殺省臣又以賄助其報仇乃詐奏蠻叛起兵殺良民甚多朵兒赤奏劾竟廢之其持平皆此類也延祐中卒官子仁通官雲南省理問仁通子幹玉倫徒字克莊有文名預修宋史官至工部侍郎王都中字元俞戶部尙書積翁子也積翁附見范文虎傳都中生三歲以恩授順昌縣尹賜田宅已而世祖追念其父死王事特授都中平江路總管府治中成宗時泄官年十七僚吏頗易其少都中遇事剖析皆賄賂不敢語學舍久壞不治而郡守缺都中曰聖人之道人所共由何獨守得爲乎乃首募大家合錢新之秩滿除

浙東道宣慰副使發金華官吏枉法受賕罪痛繩海濱姦民貌官擾民者人服其威遷荆湖北道都中以歲饑親履山谷民多全活武宗詔更鈔法行銅錢以都中爲通敏除江淮錢貨監凡天下爲監者六所鑄錢惟江淮號最精改郴江路總管溪峒猛獠強猾莫敢相與貿易都中至乃皆馴伏而郴民染於蠻俗喜鬪爭都中乃大治學舍作籩豆簋簠笙磬琴瑟之屬使其民識先王禮樂之器延宿儒教學其中以義理開曉之俗爲之變移饒州路總管年饑米價翔涌都中出官倉米定其價爲二等言於行省謂須糶以下等民乃可得食未報又於下等減十之二使民就糶行省怒其專都中曰饒去杭二千里往還定議非半月不可人七日不食則死安能忍死以待乎其民亦欲鬻妻子以代償行省聞之乃已郡歲貢金而金戶貧富不常都中考得其實乃更定之包銀之法戶不

過二兩而州縣徵加十倍都中責之一以詔書爲事以內憂去郡人爲之立生祠服闋除兩浙都轉運鹽使鹽亭竈戶三年一比附推排任事者恐斂怨久不舉行都中曰爲政者使皆避謗何以集事乃徧歷三十四場驗其物力高下以損益之役旣平而課亦足公私使之歷福建浙東宣慰使都元帥天祿初又徙廣東元統初朝廷以兩淮鹽法久壞詔命都中行戶部尙書都轉兩淮都中治之如兩浙鹽法遂修尋拜河南參知政事以疾歸詔卽其家拜江浙參知政事至正元年卒贈昭文館大學士諡清獻都中歷仕四十餘年所至有政聲當世南人位登省憲者惟都中而已其自奉甚約而厚於姻族人以爲難幼事許衡能立志嘗自號曰本齋著述見藝文志

張昇字伯高其先定州人也後徙平州幼警敏過人長力學工文

辭至元末用薦者言授翰林國史院編修預修世祖實錄遷應奉翰林文字又三遷爲太常博士成宗崩左丞相阿忽台等承中旨議奉徽號饗宗廟昇曰在故典凡有事於宗廟必書嗣皇帝名今將何書議遂弗成武宗卽位議躬祀禮昇據經引古參酌時宜以對帝嘉納之至大初改太常寺爲太常禮儀院卽除昇爲判官久之外出知汝甯府民有告寄柬書於其家者逾三年取閱有禁書一編且記里中大家姓名於上昇亟焚之曰妄言誣民且更再赦矣宜勿論同列懼皆引起旣而事聞廷議謂昇縱姦遣使窮問卒無迹乃詰以擅焚書狀昇對曰事固類姦宄然昇備位郡守爲民父母今斥誣訴免冤濫雖重得罪不避乃坐奪俸二月旁郡移文報吳人侯君遠者言歲直壬子六月朔日食其占爲兵寇歲辛丑其應在吳分野同列欲召屬縣爲備禦計昇曰此訛言久當自息


無用惑民聽也卒以無虞部使舉治行最厯江西行省左右司郎中除紹興路總管先是越大饑疫民死者殆半賦稅鹽課責里胥代納吏因緣爲姦以害富家昇爲證於簿籍白行省蠲之前守有參知江浙政事者爭代者祿米有隙欲入以罪移平江歲輸海運糧布囊三萬俾紹興製如數民患苦之更數守謂歲例如此置弗問昇以非越土所生海漕實吳郡事於越無與章上卒罷之厯湖北道肅政廉訪使南臺治書侍御史入爲樞密院判官參議中書省事治書侍御史又出廉訪淮西泰定二年參知陝西政事復遷遼東廉訪使屬永平大水昇請發海運糧十八萬石鈔五萬緡以振饑民並蠲其歲賦朝廷從之民得以生召拜侍御史天祿初出爲山東道廉訪使時方有警有司請完城以爲備昇曰民恃吾以生完城是棄民也由是人皆無恐文宗以尙醞文幣賜之逾年召

爲太禧院副使除河南左丞復廉訪淮西昇年已六十九乞致仕至順二年復起爲集賢侍講學士元統元年昇條上時所宜先十事尋兼經筵官廷試進士爲讀卷官告省墓歸賜金織文袍以寵其行明年以奎章大學士知經筵事召以疾不起年八十一至正元年卒贈資德大夫河南左丞諡文憲

韓鏞字伯高濟南人也中延祐五年進士第授翰林國史院編修泰定時累官監察御史時帝欲以中書參議傅巖起爲吏部尙書鏞上言巖起從吏入官不可任三品語在選舉志制可其奏天祿初除僉浙西廉訪司事擊姦暴黜貪墨而特舉烏程令干文傳治行最郡縣爲肅厯國子司業南臺治書侍御史順帝卽位僉宣徽院又僉樞密院事至正二年除翰林侍講學士尋遷侍御史以剛介爲時所忌因誣劾其贓私乃罷位去五年臺臣辯其誣復起參

議中書省事逾二歲朝廷議慎選守令參知政事魏中立薦鏞帝乃特署鏞姓名授饒州路總管饒俗尙鬼有覺山廟者自昔爲妖以禍福人鏞至卽撤其廟沈其土偶於江凡境內淫祠皆毀之鏞知民可教乃選俊秀入學求宿儒列爲五經師旦望必幅巾深衣以謁先聖每月考課以示勸勵由是人各致力於學鏞居官自奉甚薄僚屬亦皆化之先是朝使至外郡者官府奉之甚侈一不厭其所欲卽銜之往往騰謗於朝鏞每延見使者郡舍中供以糲飯使者皆聞鏞名退無後言其後有旨以織幣脆薄遣使笞行省臣及諸郡長吏獨鏞無與鏞政聲甚著十年召拜參知政事是時脫脫爲丞相議更張庶政鏞有言不見聽而龔伯璘等用事遂言鏞優於治郡而執政非其所長乃出參知甘肅政事及脫脫罷相其黨皆誅而鏞得免遷西臺御史中丞卒官

論曰李秉彝諸人皆卓然良吏也秉彝能拒邪說居貞力護南人張昉不以冥冥墮行袁裕深得民情燕公楠朵兒赤以闢土間干奴吳元珪並屢進讜言王都中張昇韓鏞堅白不易風采蔚然矣昉力完人絲朵兒赤之折鐵木迭兒皆人所難能也秉彝在膏不潤昉見利思義充其志上足而下不困矣焉用阿合馬剝民爲哉



曾毓華 刊

李桂如

門人曾傳銳襄校

門人曾士琮詳校

元書卷六十九

元書卷七十

邵陽曾廉撰

趙天麟鄭介夫黃如徵列傳第四十五

趙天麟東平人也博學能文至元時以布衣上太平金鏡策其略曰聖人立茲名教昧全理而執偏迹者皆異端之流有上達而無下學者皆亂人之類也性者心之齊而具理也情者心之發而為事也理以存妙事以應務愛以盡公宜以方外節以暢文覺以燭暗實以明誠此七者其實性情而已矣性定而情自檢者心也情定而性自復者亦心也凡在下者心定則非分之望消在上者心定則化育之方備此自然之道也公者義也私者利也量義以動則憂以天下樂以天下而王道備矣放利而行則既失民望且失民心而王政衰矣此帝王之德貴公而不私也臣聞未宜輕舉者

四海之宗不可常虛者三台之位矧此國基繫乎太子今國家內  
焉三公九卿外而庶彊諸尹例皆舉賢推德揆務分司至於中書  
一令樞密一使常使東宮領之名爲重之適所以輕之也若謂藉  
其重以鎮之則舉朝庶政無不奏聞天威已鎮之矣何煩太子哉  
若謂他人不得居此職則太師太保太傅司徒國王暨列公不下  
於此異姓亦嘗任之矣况太子之道春誦夏弦秋習禮冬讀書龍  
樓問寢甲觀尊師以徽柔爲本以仁孝爲先及其旣冠則有記過  
之史徹膳之宰進善之旌敢諫之鼓此周公示法於成王賈子忠  
告於漢文也伏望慎選碩德耆舊之人早令輔導無令降居臣職  
以輕其身當使益增其明以成其孝更近擇宗室旁及巖穴舉大  
賢充令使之官卽聖主錫軍民之福也禮天子立七廟祖功宗德  
百世不易親盡之廟因新而祧祧主旣藏祫則出餘則否散齊七

日致齊三日牲牲肥腍旨酒嘉粟粢盛豐潔器皿具備衣服旣鮮  
水火又明設廟祧所掌之遺衣陳奕世遞傳之宗器王后及賓禮  
成九獻辟公卿士奔執豆籩此廟之時祭也太祖廟主循常東面  
移昭南穆北而合食就已毀未毀而制禮四時但陳未毀而祭之  
五年兼其已毀而祭之此廟之祫祭也三年大祭祭始祖之所自  
出以始祖配之此廟之禘祭也臣聞祭祀者人之大端衣食者人  
之常理聖朝立太常之正卿設司農之大寺欽乃攸司可謂備矣  
但今藉田之禮尙未舉行公桑之儀似有虧闕郊天祀祖而發倉  
廩以取粟非陛下之所耕向坊局而求衣非后宮之所出以之對  
越神祇享於祖禰道或未盡陛下之心能無少歉乎謹案禮經正  
月上辛之日祈穀於太微之帝再擇乎吉亥之辰爰至南郊天顏  
咫尺恭就三推黎庶三百遂終千畝內宰獻種於厥后神倉斂穫

於西成此天子藉田之禮也載按經文衣服不備不敢以祭天子有公桑之地后妃齊戒而臨焉歲既單矣奉繭獻后后乃親繰手既三盆事終羣下染以元黃朱綠爲之黼黻文章君王致祭從而服之此后妃公桑之制也伏望陛下及中宮成茲盛事則下使田家服勤上獲宗廟垂祐矣井田之法計方千里之地提封百萬井山川城寺等除百分提封之三十六外定六十四萬井爲私田五萬一千二百萬畝其井中區除宅居二十畝之餘爲公田五千二十萬畝又乘除粟稻等子粒之多寡每畝歲率一石五斗計之則私田子粒可得七萬六千八百萬石公田子粒可得七千六百八十萬石其鰥寡孤獨無告者尤先賑惠焉上下和睦貧富相均此隆周所以旁作穆穆迓衡而孟子不憚區區告人也自嬴秦變法之後越至於今迫於豪富官貴而不能復國家用費之資僅足下

民愁歎之聲未除方今之計莫如興復井田尙恐驟然騷動宜限田以漸復之望陛下一新田制自宗室王公以下皆爲定限欺蔽田畝者坐以重罪其限外之田卽令佃戶爲主未墾者則令無田之民闢之三年科徵所占田亦不得過限以後買田亦有限斷私田既定乃定公田公田當爲九等一品二十頃二品十八頃三品十五頃四品十二頃其下俱以二品爲差至九品但二頃而止庶乎民獲恆產官足養廉行之五十年後井田可興復矣天麟又以是時朝多冗官復上疏曰臣聞唐虞稽古建官惟百夏商官倍亦克用又周卿分職各率其屬厥後官愈多而治愈不古是以漢光武廢四百縣而下民業定隋文廢五百部而天下政行皆以官不用多而在乎得賢政不徒煩而在乎省事也今國家立制自宗王及國王郡王國公以下爲爵自特進崇進至將軍校尉郎爲階自

正一品至從九品養廉之資爲祿各司贊佐行文之史爲吏其制亦詳矣然京師無用之署局不急之司院及隨朝臺省院部以下諸有司官吏亦有冗者矣武臣萬戶所統不滿萬人千戶不滿千人之類亦已有之矣臣竊以爲冗官之大弊有三官吏員數旣多攷滿時旣有資格之簿復多保薦之文交錯旁午有司行文且未暇奚暇問人之才德而攷校之哉於是雜流之途進貨賄之竇開經營者早得遷除養高者坐淹歲月此選法之弊也夫文武官吏人數旣多有當決之事而不決有當行之事而不行問其職則曰我職也問其施爲則曰僚屬非一豈我所能獨主也及乎朝廷聞之遂立稽違期限之罰不亦甚歟此政事之弊也夫國家用人路廣浮濫得升使之臨蒞在下必不能敷宣政化如是則刻剝之苦役使之煩爲害良多此軍民之弊也三弊不絕而徒立法以防之

不知法立而懼法之人姦欺之計益生矣伏望察此三弊官吏可併罷則併罷之然後慎重名器擇人而用黜幽陟明順理而攷則典選者易見其人易程其效而選法清矣臨政者事有所歸職有所主而政績成矣在下者省於煩役免於苦刻而民業定矣民者天下之本民業定而天下不太平者未之有也時赦令頻頒凶人賄脫者眾天麟復上疏曰赦者欲以滌蕩瑕穢與民更始也然以負罪者言之則爲莫大之深恩以致治者論之則非太平之常事也近世以來郊天祝宗建儲立后未有不肆赦者豈不啟僥倖非濫之心哉遂使攘劫服贓而詫議善良屏息以含冤况奸邪未嘗衰止朝脫囹圄夕攫縲綬其不能承化自新亦已明矣今朝廷不忍人之心旣形於外不能自己推此以及良民順天道以正生殺則周文之治不難同也若當罪而有之當殺而生之亦猶來暄風

於霜雪之辰行春令於秋冬之際如此而欲天道之成臣不知其可也成宗初立天麟復上逃民策曰伏讀辛酉詔命中統建元以前逃戶復業者戶下差稅本年全免次年半徵三年後始依例起科自此累頒詔文優卹逃戶蠲免積逋斯皆先帝惠也臣謂逃民之故有五一日天二曰官三曰軍四曰錢五曰愚蓋有田之家田爲恆產饑饉糧竭因而就食此天致之逃也守令刻苛役斂煩興富以賂免貧難獨任此官致之逃也軍資不贍鬻賣田產無以供給此因軍而逃也生理不周舉債乾沒子本增積不能速償此無錢而逃也弗恤艱難隕墜遺業悔恨莫追窮困失所此則愚而逃者也惟詔有云苟避差發臣謂此實官之罪也昔漢兒寬爲內史軍發負租課殿當免民間大家牛車小家擔負輸租纏屬課更以最此益民信愛之故也豈有避差發者哉伏望下哀痛之詔察化

導之義從前逋負差稅並行除免凡有田者聽復本業無田者聽於曠土占田貧無牛種田器者官爲貰之其因軍而逃者驗實貧爲助資之戶負債者復業之後五年外一本一利償還至旣復業而尙游手荒廢農務者罪之逃民已定於是慎名器以絕濫虛之官限田產以絕兼並之路重農桑以絕失業之人設義倉以絕凶歲之厄向之逃民雖賞之亦不復逃矣此之謂務本天麟數陳事言防奢汰異服色訓宗室立社倉置諫院定軍役除差稅惜農時開武科設天駟監廣群牧所又以雲南金齒路進馴象極言無益而罷敝中國文多未及備載

鄭介夫字以居衢州開化人也成宗大德七年上太平策其略曰昔齊桓五子爭立而霸業遂微晉獻讒廢申生至國亂數十年始皇以扶蘇不定致使滅宗惠帝以繼子不明幾至易姓自後由此

敗亡者不可勝計草茅之士猶不能忘情而秉鈞當軸之臣略不及此何邪今皇太子嗜欲未開心術未定宜擇端人正士以傳翼之與之居處出入使通古今治亂之成迹明君子小人之情偽所謂教得而太子正太子正而天下定矣且古者建東宮立太子將以重國本定民志非泛然之美稱也今諸王公子例呼太子嫡庶親疏略無差別昔晉申允曰太子統天下之重而與諸王齊冠遠遊非所以辨貴賤也同衣冠猶不可况可同名號哉吏之與儒可相有而不可相無者也儒不通吏則爲腐儒吏不通儒則爲俗吏漢人稱以儒術飾吏治正此意也今裁吟詩習字卽名爲儒檢舉式例會計出入卽名爲吏吏則指儒爲不識時務之書生儒則詆吏爲不通古今之俗子本一而二之人員所以尤也今朝廷旣未定取人之科當思所以救弊之策百官自三品以下九品以上並

內外互相注授庶使儒通於吏吏出於儒儒吏不致扞格內外無分輕重矣古者自州縣以上皆天子自選故銓曹每擬一官必先稟命於天子天子欲用一人亦詢其可否於執政今乃以省部除授之官指爲常選以天子委用之人指爲別里哥選夫天下之官孰非天子之臣安得以一朝省而自分爲兩途耶漢以銅錢而權皮幣之重皮幣爲母銅錢爲子宋以銅錢而權交會之重交會爲母銅錢爲子國初以中統鈔五十兩爲一錠者蓋從乎銀錠也以銀爲母中統鈔爲子旣而銀已不行所用惟鈔遂至大鈔爲母小鈔爲子今以至元一貫準中統五貫是以子勝母以輕加重以後踰前勢不至於大壞極弊不止夫鈔爲一時之權宜錢爲萬世之長計盜賊難以賫行水火不能消滅世世以爲通寶說者謂鑄一錢費一錢無利於國不知費一錢可得一錢利在天下卽國家無

窮之利也唐劉晏專用權鹽以充軍國之用其言曰官多則民擾但於出鹽之鄉置鹽官收鹽戶所煮之鹽轉鬻於商任其所之或商絕鹽貴則減價鬻之謂之常平鹽由是國用充足民不困敝此已驗良法也今宜罷鹽運司及各場所官吏盡歸有司於產鹽處所設鄉官一員專掌支發以富室當亭戶亭戶自行收貯竈戶任便煎煮隨處立倉交納此則停戶不至逃亡竈戶可免追剝民戶亦無團巡誣逮之擾且既省俸給工本自可全收課程官享其利而民安其業矣今街市之間名曰嫁漢曰把手合活曰坐子人家十室而九行路爭相倣倣此風尤爲不美且抑良爲賤待告而禁終不能絕若令有司覺察或許諸人陳首但有此等盡遣從良此可厚俗之一也南北風俗不同北方以買來者謂之軀口南方以受役者卽爲奴婢故唐法奴告主者皆勿受此可厚俗之二也古

者宗廟禴祠蒸嘗皆天子親享不敢使有司攝也宜檢討舊典親行享廟之儀仍令天下無論官庶之家有親在而諸子忍於分析及居官客外而違於生事死葬者並論不孝此可厚俗之三也父子夫婦綱常之大者今鬻子休妻視同犬馬雖有抑良買休之條而轉售者則易其名曰過房受財者則易其名曰聘禮且大都上都有馬市羊市牛布兼有人市人畜相等亦可憐矣宜嚴行禁絕使各相保守無棄天倫此可厚俗之四也九品之官定爲九等士農工商僧道定爲六等下而臧獲定爲一等使服飾各安分限貧富不得僭踰此可厚俗之五也漢立常平倉穀賤增價而糴以利農穀貴減價而糶以利民朱文公嘗行之浙東然不可行於今矣何也官吏爲奸若官入官出民間未沾賑濟之利且先被剋減計點之擾適以重困耳宜於各處設立義倉令百姓各輸已粟自掌

出入之數猶慮風俗不古急義者少則官爲之立式計畝出粟並嚴禁本甲侵欺及司縣官挾勢借貸此誠安民定業之長策也至於目前之急官司雖賤價賑糶有限之粟不能應未已之荒若勒令富家平糶則大戶縱賄而求免小戶力貧以奉行流害滋甚不如收米於稔熟之區或倣漢時輸粟爲郎宋時官賣度牒之例則糧可立致矣國家立政必以刑書爲先今天下所奉行者有例可援無法可守官吏因得並緣爲欺內而省部外而郡府鈔寫格條多至數十冊遇事有難決則檢尋舊例或中無所載則旋行比擬是百官莫知所守也民間自以耳目所得之教旨條令雜采類編刊行成帙名曰斷例條章曰官民要覽家置一本以爲準繩試閱二十年間之例較之三十年前半不可用矣更以十年間之例較之二十年前又半不可用矣是百姓莫知所避也號令不常初降

隨沒遂致民間有一緊二慢三休之謠京都爲四方取則之地法且不行况四方乎如往年禁酒而私醞者比屋禁牛而私宰者盈市奸盜殺人罪在不赦而每歲放禿魯麻婚姻聘財明有官庶高下折鈔之例而今之嫁女者重索財物與估賣軀口無異買賣田宅舊有先親後鄰之條而今民業多歸勢要推此數端天下概可知矣今有司每視刑名爲重而戶婚錢債略不加意不知此乃奸盜殺人之緣起也憲司巡按每以賊罰爲重而一切民詞略不省察不知此卽官吏受贓之端也更兼衙門紛雜事不歸一正宮位下自立中政院匠人自隸金玉府校尉自歸拱衛司軍人自屬樞密院諸王位下自有宗正府內史府僧則宣政司道則道教所又有宣徽院徽政院都護府白雲宗所管戶計諸司頭目布滿天下彼此不相統攝無法之弊莫此爲甚昔先帝命修律未及成書近

議大德律所任非人訛舛益甚宜於臺閣省部內選通經術明治體練達時宜者酌以古今之律文參以建元以來制敕命令兼采南北風土之宜修爲一代令典使有司有所遵守生民知所畏避庶政體歸一獄無久淹矣古者立刑必先施於賊吏國家昔定爲枉法不枉法之例今則枉法者除名不敘不枉法者並殿三年制法雖明而犯者未已何也可縣官困於正從七八品間終老無受宣之望吏員困於路縣終老無受敕之期凡人之自愛其身而重於犯法者以清議之可畏前程之尙遠也旣無畏無慕則仕爲貧耳復何所惜且昔有刺配籍沒之法文其面則終身不齒於鄉里籍其家則全家不免於饑寒治賊吏法爲最善也賊吏固嚴其罪矣然廉吏則未見賞今省部置吏過名簿不聞有功績簿憲司歲報賊罰冊不聞有廉能冊朝廷雖有封贈之典未見舉行嗣後有

至廉無擾者歷一考則封贈其父母再考則封贈其妻妾不過邀朝廷一命之恩光而可收激勸人材之實效矣當今之弊不在俸祿之薄而在俸祿之不均及設官之太濫均有餘以周不足取濫設之米以給合設之官則職田所收自可敷用今又額外多出俸米二十八萬餘石徒損國儲無益官吏且丞相職居人臣之右每月得俸八錠有零一日之俸不滿四十兩夫大臣律身自宜從儉天子立相豈可先處以約而薄其所養哉又俸自三錠以上者不得添米官益高而俸益少甚非尊尊貴貴之道也又如隨朝大小官及各行省宣慰司皆樞要重臣旣無所取於民又無職田可收縱添俸米何足養廉宜盡取元撥職田合計子粒收貯而普及之內外臺察廉訪司事煩而形神勞官清而交往絕比之有司量加優厚所以重風憲也和林上都山後河西諸州城不係產米之地

依本處時估折價不當拘以定數所以重邊疆也宜將官收職田錢糧先儘外任數足其餘盡令起運赴都以給隨朝官吏計其所得倍多於前又可無過費太倉之粟此利國利官之要道也昔田千秋一言寤主卽登侯相鄭然明一言見知便獲賞識古今際遇往往皆然若必待羔雁以爲先容幣帛以將厚意則千秋老死於郎官然明終役於堂下耳今之隸名儒籍者不知壯行本於幼學而曰借徑可以得官皆曰何必讀書然後富貴仕路旣不出於儒何須虛費日力但厚賂翰林集賢院求一保文或稱茂異或稱故官或稱先賢子孫白人卽保教授才入州選便求升路才歷一任便幹提舉但求遷轉之速何問教養之事學校遂成廢弛言者皆歸咎於差役所致不思唐宋盛時儒人未嘗免差而士風甚盛人材甚廣無他聲名誘之於前利祿引之於後也使前數年不當差

役亦未見有一人成材者果業儒而獲用則人自慕尙雖當役不足以抑之苟業儒而無用則人皆厭棄雖免役何足以勵之耶比者如編一統志寫金字經非有追章琢句之巧考古證今之難也愚夫下流但能繕書者皆可與選給食賞鈔已足以酬其勞更與之升職減資是朝廷開天下以奔競之路也明詔德行文學高出時輩者有司保舉廉訪司體覆相同以備擢用年來中外所舉不爲少矣未見擢一才拔一士豈非虛文求人乎明詔上書陳言者皆得實封進獻年來官庶所陳不爲少矣未聞納一諫從一事豈非虛文求言乎格例諸縣尹以五事備者爲上選三事成者爲中選五事俱不舉者黜今實備五事而無力者止常調虛稱五事而有力者則引例升等豈非虛文考績乎國家立御史臺及肅政廉訪司糾彈諸人無得沮壞今所糾者僅可施之卑官下吏所薦者

呈省到部俾同故紙而外任巡按書吏人等反借風憲之威徇私  
納賄無所畏忌其爲民患過於有司豈非虛文重臺察乎至元新  
格常事五日程中事七日程大事十日程今小事動經半年大事  
輒以數歲豈非虛文議獄乎詔書案降停罷勞民不急之役存恤  
鰥寡孤獨之人今之隸名官籍者皆坊正巷長略舉市閒所知以  
應故事其實窮而無告者未嘗登籍沾惠也豈非虛文愛民乎國  
家立司農司以敦農政路縣正官衙內加以兼勸農事每歲仲春  
令親行勸課今官吏出郊借此游宴里正社長科斂供給豈非虛  
文務農乎國家倣古立翰林院集賢院秘書監太常寺可謂彬彬  
文物之盛矣今翰林多不識字之鄙夫集賢爲羣不肖之淵藪編  
修檢閱皆歸門館富兒秘監署丞半是庸醫繆卜職奉常者誰明  
乎五禮六律居成均者誰通乎詩書六藝他如醫學儒學蒙古學

各置提舉司尤爲無益國政豈非虛文設官乎國家設立太史司  
天以明占測崇奉國師宗師以嚴祈禱可謂盡事天之誠矣今日  
月薄蝕則期集鼓奏以彰信推秣未嘗尅定其應驗星象失纏但  
託辭禳度以分受官物未嘗指稱其變故罄竭公帑以供西僧好  
事盛陳金帛以副黃冠醮筵豈非虛文對越乎聖朝定奪諸色戶  
計何嘗一毫損民如水馬站戶與之除糧免差資糧足以補辦祇  
應可抵里役如金戶辦金則就準本戶合納之稅匠戶當工則官  
支口糧以資贍養竈戶燒鹽則給以工本銀場煉鍛旣給工本又  
與口糧計所入課程正與買價無異愛民之厚於此可見今各處  
巡尉司設弓手各路縣尉司設禁子牧民官各衙門設祇候曳刺  
旣免糧以優之而有司不與開除反令稅戶分任包納於各輸額  
糧之外別立名項曰包米誠古今所未見且各戶勞逸相懸如站

有消乏金須本色竈欲辦課匠不離局設有不及訶責踵至所準  
稅糧豈足供給而弓手祇候曳刺禁子等戶役甚優閑無費於已  
且可肥家不知何自而與之免糧哉古稱侍衛禁直左右前後之  
人今謂之怯薛歹以今倣古古者數多名錄今視古頗簡周禮天  
官冢宰曰膳夫庖人曰外饗內饗曰漿人曰烹人籩人今之博兒  
赤也曰幕人曰司服曰司喪曰內宰今之速古兒赤也曰掌舍曰  
掌次今之阿察赤也曰關人今之哈勒哈赤也曰縫人屨人曰典  
婦功今之玉烈赤也曰宮人今之燭刺赤也古者分以職役定以  
等差用當其人人當其任是以人無覬覦各守分義今則不限以  
員不責以職但挾重貲有梯援投門下便可報名請糧獲邀賞賜  
皆名曰怯薛歹是各官門下之怯薛非天子御前之怯薛也比者  
朝省嚴行分揀如有職役定員則挾貲投入者無所容力有出身

定例則別里哥選不禁自絕矣今國家財賦半入西番紅帽禪衣  
者公然出入宮禁道家以老子爲宗惟在清淨無爲辟穀棄人間  
事今張天師縱情姬愛廣置田園招攬權勢凌爍官府此江南一  
大豪霸也朝廷別立宣政院道教所以其棄俗出家非有司所可  
統攝而乃恃寵作威公行賄賂僧道詞訟數倍民間奸盜殺人諸  
不法事往往見告各寺既有講主長老各觀既有知觀提舉足任  
管領之責隨路又濫設僧錄司道錄司各縣皆置僧綱威儀此反  
爲僧道之蠹也且亡金棄人尙鬼故置二司與民官鼎立而三豈  
謂聖朝踵其弊政僧道旣全免絲稅愚民又多出財產託名詭寄  
以求蔽役驅國家之實利歸無用之空門視民間輸稅之外又當  
里正主首和顧和買非惟棄本逐末實且勞逸不均今後寺觀常  
住稅糧宜準古法盡令輸官外有白雲宗一派旣自別於俗人又

復異於僧道朝廷不察其僞特爲另立衙門此並宜革去以除國蠹寬民力也春秋二百四十年閒災變迭出地震者五國家自十數年來凡三見以今攷古未有若此之數數也漢史翼奉言地變爲陰氣太盛宜疏后黨親同姓出後宮損陰氣李尋曰地震有上中下上位應后妃中位應大臣下位應庶民宜弱外戚強本支崇陽抑陰以救其咎或以言游畋土木或以言宦臣嬖倖或以言小人黨盛各因時弊而指斥之耳以今日人事觀之闕儀嚴肅女謁不行如呂韋之專趙楊之寵無有也後宮列陳名不盈數如三千一萬之充滿無有也秉國鈞者皆色目漢人未嘗一官任舅后之族如呂霍上官之僭奢無有也敷奏出入非臺省不得與聞未嘗一事出闈宦之口如茶顯魚程之專擅無有也春秋出畋循行故典宮牆殿宇一安舊規如阿房復閣之興樓船錦纜之侈無有也

然則致此變也既皆非此之故意當歸之執政大臣乎季路問事鬼神子曰未能事人焉能事鬼敢問死曰未知生焉知死此乃三教是非之所由分也况達磨面壁九年維摩不二法門止爲身計何嘗施禍福於人張道陵遠處深山薩真人一瓢自隨厭與俗接何曾妄有希求往年見帝師之死驛取小帝師來代不過一庸廝耳舉朝郊迎望風羅拜愚一至此哉昔達磨自南天竺來梁武帝問曰朕造寺捨經度生不可勝紀有何功德師曰並無功德此但天人小果有漏之因如影隨形雖有非實此足以解求福田利益者之惑也陳搏召自華山宋太宗使宰相宋琪等問以修養之道對曰縱鍊養有術白日昇天何益於治今聖上洞達古今深究治亂正君臣合德致治之時勤行修鍊無以加此此可爲求神仙者之鑒也唐會昌中爲僧尼耗蠹天下命併省佛寺上都東都各留

二寺上州留一寺中下州並廢寺分三等上等留僧二十人中等十人下等五人餘僧及尼皆勒歸俗通毀招提蘭若四萬餘區收良田數千萬頃奴婢十五萬人歸俗僧尼二十六萬五百人此又成法具在者也今日未嘗無邊遠選固有準保定奪者矣但始忽於立法防奸後又失於計功覈實如雲南甘肅八番兩江等處統帥藩臣一赴闕下便行保人計品定價多者百錠少亦三之二街市富子爭先營求並未嘗涉厯塞庭錄習邊事也當今八方安堵正無事於窮征遠討但務安集故地足矣往者劉鄭妄開邊釁以至雲南不安尺地皆祖宗之遺業一民皆祖宗之赤子不宜置之度外如八百媳婦素不沾化縱令盡有其土地人民初無益於聖朝萬一生事之臣但知可以要功希賞不知有損於國家甚大也自古天下之田無不屬官先王授田使貧富強弱無各相過得以


自耕故天下無甚富甚貧之民商鞅用秦已不復有井田之舊於是阡陌既開乃有豪強兼并之患然猶不明言田在民也漢亡三國並立兵火之餘人稀土曠但隨其力所能至而耕之元魏行均田唐因而損益之爲法雖善然令民得賣其口分永業日漸一日而公田盡變爲私田矣田既屬民乃欲奪富者之田以與無田之民禍亂羣興必然之理也董仲舒在武帝朝去古未遠乃曰井田雖難猝行宜少近古限民田以贍不足言甚善而未果行至哀帝時孔光何武曰吏民名田無過三十頃期盡三年而犯者沒入官三十夫之田也以一人而兼三十夫之田亦已過矣而期之三年似太迫爲今之計豪強卒難禁止惟有限田之法可以制之酌古準今宜爲定制也古者給價換馬已非長策今乃刷馬民間尤爲

弊政夫南北風土不同冷熱大異若刷東南之馬以供西北之用則立見其死亡耳且牧於野者安於水草習於馳驟以之臨敵易於鞭策畜於家者飽以芻豆勤以剪拂一旦置之荒郊便已無力况雖曰和買何異白奪昔亡金鄰敵交攻疆土滋削未免刷之民閒以應一時之急堂堂天朝豈宜出此兼以實無所用而民怨皆歸於國亦何爲哉唐初得牝馬三千匹徙之隴右命張萬歲掌之蕃息至七十萬匹分爲八坊四十八監各置使領之是時天下以一縑易一馬及元宗以王毛仲爲內外閑廐使東封之日有馬四十三萬匹牛羊稱是此已然之明驗也今國家土宇數倍於唐擇水草甘美宜牧之地各設監官給牝馬選能吏使專牧養之權重職任優俸祿責以成效不十數年馬不可勝用矣介夫論當時事甚悉不能盡用也官終金谿縣丞著述見藝文志


黃如徵江西儒人也至正五年遣官宣撫諸道問民疾苦諸奉使多不職如徵走京師邀駕上書略曰皇朝版圖之廣歷古所無法制之良萬世莫易而水旱災變連年不息實由官皆汗濫民悉怨咨之所致也陛下憂民之心日夕孜孜乃於去年冬分遣大臣宣撫諸道禮賢德振貧乏信冤抑起淹滯苟能宣布聖澤各盡厥職則雍熙泰和之治正在今日然江西福建一道地處蠻方去京師萬里外傳聞奉使之來皆若大旱之望雲霓赤子之仰慈母而散散王士宏者不體聖天子撫綏之意鷹揚虎噬雷厲風飛聲色以淫其中賄賂以緘其口上下交征公私朘削賊吏貪婪而不問良民塗炭而罔知閭閻失望田里寒心致有九重丹詔頒恩至萬兩黃金奉使回之謠皆百姓不平之氣鬱結於懷而發諸聲者然也此皆廟堂遴選非人使生民感陛下憂恤之虛恩受奉使掊克之

實禍陛下於此而不察將何以取法後世哉如徵無官守言責所以不憚江河之險不避斧鉞之誅而詣闕以陳其事者正恐散散王士宏輩回觀之日各飾巧辭妄稱官清民泰欺詐百端昏蔽主聽倘爲奸邪所賣擢任省臺恣行威福流毒四海則江西福建一道之痛苦與天下共之以此而望陰陽和風雨時年歲登邊隅靜不亦難乎倘陛下不棄芻蕘委官察其實蹟責以欺天罔民之罪投諸遐荒以爲百官勸戒天下幸甚如以誹謗大臣置而不問非惟今日禍起蕭牆抑且天下萬世之不幸矣鄙俗之言觸犯清蹕罪且不赦請伏鑕以俟命帝覽書色喜慮爲權豪所中顧近臣館穀於外越數日特授江西等處儒學提舉敕侍衛護之出都如徵受命不領職天下共賢之

書論事忠誠懇發何其摯也天麟學行甚高故言之有本介夫指陳鑿鑿如徵不憚伏鑕以折姦回山之僞矣元厭漢法良謀不用如徵乃見衰於荒主斯亦奇哉



元書卷七十



曾寅陔

曾毓華 刊

李桂如

門人曾 校襄校

門人曾士琮詳校

元書卷七十一

邵陽曾廉譔

塔刺海塔思不花乞台普濟劉正郝彬禿忽魯伯荅沙列傳第四十六

塔刺海太師月赤察兒子也月赤察兒在其祖博爾忽傳塔刺海以勳臣子孫出入禁闈至元末為左都威衛使大德中歷徽政使樞密副使同知樞密院事進知院事宣徽使武宗即位缺左丞相欲相之塔刺海奏曰中書大政所出細而金穀銓選臣國人也素未嘗學樞密宣徽二政三使所領已繁又長怯辭及春秋隨駕蒐獮誠不敢舍是以干大政敢以死辭帝不允拜左丞相仍知三院事與右丞相合刺合孫定議成宗及皇考順宗諡號祔廟位次事具郊祀志尋加太保錄軍國重事代合刺合孫為右丞相監修國

史俄命兼太尉奉土成宗順宗廟室冊寶詔曰成宗嘗賜卿田六千畝今加賜四千對曰萬畝之田歲入萬石臣待罪宰相先規己利人謂臣何江南民力極矣請辭萬石之入入官以蘇民力帝許之益嘉其讓竝諭諸人賜田皆還官塔刺海又讓還太尉曰世祖未嘗以此官官人臣不敢受帝亦許之是時塔刺海父子及弟俱頭竝蒙盛寵而帝性好奢逸政出多門名器猥雜賞賜尤濫塔刺海端良剛毅既居右位頗欲正紀綱乃與左丞相塔思不花上言中書庶務同僚一二近侍往往不俟公議卽以上聞非便又言內降旨與官者八百八十餘人朝會應賜各鈔總三百五十萬錠兩都所儲已虛自今內外銓選及錢穀鹽法應皆由中書定議無得越奏帝善其言而亦未能盡從也俄又命兼中政院事一時殷眷無與爲比至大元年從幸上都至懷來薨帝甚念之三年賜其妻

金銀如諸宗親禮詔贈智威懷忠昭德佐治功臣開府儀同三司太師上柱國淇陽王諡曰惠穆

塔思不花歷官御史中丞太僕卿大德八年遷右丞俄命行御史中丞武宗卽位進御史大夫是時臺綱頗弛塔思不花上言殿中司所職中書而下奏事者必使隨之以入不在奏事之列者退其引退班朝百官朝會失儀者得糾劾病故者必以告請如舊制又言先時內外風憲官有所彈劾諸人勿預而近有受贓爲御史所劾者獄具實緣奏請託言入覲以避其罪臣等以爲自今後有罪者勿聽至京待其對辯事竟果有所言方許奏陳皆從之又言皇太子有旨有司贓罪不待刑部定議受赦者從廉訪使處決省臺遣人檢覈廉訪司文案私意沮格非便平章政事阿沙不花因言此臺省共議事臺臣不宜獨奏帝曰此御史臺事阿沙不花勿妄

言臺臣言是也卽遙授左丞相轉右尋代塔刺海爲左丞相加太尉塔思不花上疏言政事且辭太尉還所降制書及印至大元年復代塔刺海爲右丞相加上柱國監修國史尙書省之立塔思不花屢言非制帝不從尙書省竟敗仁宗諒闇塔思不花復改爲御史大夫而以鐵木迭兒代爲右丞相數年薨

乞台普濟不知其所由進武宗卽位特授平章政事加太尉至大元年代塔思不花爲左丞相加錄軍國重事旣而又以乞台普濟與塔思不花同爲右丞相二人因言國用不給請沙汰宣徽太府利用等院籍定應給人數其在上都行省者委官裁省又行泉院專以守寶貨爲任宜禁私獻又天下屯田百二十餘所由所用非人以致廢弛除四川甘州應昌府雲南爲地絕遠餘當選習農務者往與行省宣慰司親履其地決其興廢具籍以聞竝從之明年

復言諸人恃恩徑奏璽書不由中書直下翰林院給予者今覈其數自大德六年至至大元年所出六千三百餘道皆於田土戶口金銀鐵冶增餘課程進貢奇貨錢穀選法詞訟造作等事害及於民請盡追奪之今後有不由中書者乞勿與制可未幾議復尙書省塔思不花乞台普濟皆不謂然帝已有所主乃改命乞台普濟爲太傅尙書右丞相乞台普濟因言古者設官分職各有攸司方今地大民眾事益繁尤若使省臣總挈綱領庶官各盡厥職其事豈有不治頃歲省務壅塞朝夕惟署押文案事皆廢弛天裁民困職此之由自今以始省部一切皆令從宜處置大事或須上請得旨卽行用成至治上順天道下安民心又言國家地廣民眾古所未有累朝體格前後不一執法之吏輕重任意請自太祖以來所行政令九千餘條刪除繇尤使歸於一編爲定制帝竝許之未

元書 卷一百一十一  
三十一  
幾乞台普濟以尙書省臣多蒙罔嗜利因以病自免去於是脫虎  
脫遂代爲尙書右丞相武宗崩仁宗盡誅脫虎脫等罷尙書省皇  
慶二年以乞台普濟潔清自矢特封安吉王延祐五年薨

劉正字清卿青州人也讀書習吏事初辟制國用司令史改戶部  
令史至元八年罷諸路轉運使司立局考核逋欠大都運司負課  
銀五百四十七錠運使等四人皆被逮及核本路籍貫無負故獄  
久不決正察其冤遍閱吏牘得至元五年李介甫關領課銀七契  
適合其數驗其字蹟皆司庫辛德柔所書也德柔結交權貴莫敢  
誰何正白尙書捕鞠之辛遂伏辜而四人得釋正由是知名辟掾  
中書十四年分省上都會河平王昔里吉叛至居庸關守者告前  
有警且姑退正曰職當進而弗往後至者益怯矣馳至上都邊將  
請黃白金符充戰賞主者告乏中書遽檄工部造給之後帝以爲

欺罔正曰軍賞貴速先造符印而後請命豈不可乎帝遂釋然十  
五年擢左司都事時阿合馬當國與江淮行省阿里別崔斌爲隙  
誣以盜官糧四十萬命刑部尙書李子忠與正馳驛往按其事獄  
弗具阿合馬復遣北京行省參政張澍等四人雜治之竟置二人  
於死正乃移疾歸里十八年徵爲左司員外郎明年阿合馬併中  
書左右司爲一遂爲左右司員外郎阿合馬敗復爲左司已謁告  
去中書傳旨捕正與參政別都魯丁等至帝前問曰汝等皆黨於  
阿合馬能無罪乎正曰臣未嘗阿附惟法是從耳會日暮械繫闕  
東復繫之拱衛司丞相和禮霍孫曰上嘗謂劉正衣白衣行炭穴  
十年可謂廉潔矣得免歸未幾樞密院奏爲經歷遷本院參議二  
十五年尙書省立擢戶部侍郎遷本部尙書嘗舉覈河運官虧課  
幾陷於罪乃復告去數歲桑哥敗復爲戶部尙書進參議尙書省

罷仍參議中書事湖南有宣慰庶子因爭蔭誣告其兄匿亡宋官金正知其情罪之仍官其兄時有人向正求爲兩淮運使正知其不才弗與遂作飛語構其事帝召正詰之曰匿金事在右司爭蔭事在左司參議乃幕長寢右而舉左能無私乎正辯析明事遂釋三十年遷南臺中丞大德元年以爲同僉樞密院事復出爲雲南左丞時右丞忙兀突魯迷失請征緬正不可力阻之不得師出果無功雲南民歲輸金銀差官領兵往徵必重賂行省乃得遣至則多方求索上下耗費正首疏其弊給官秤令土官自行輸納弊頓革而庫財歲有增焉又與右丞忽辛力陳民所不便詔從之事在寶典赤贍思丁傳八年移江西又移江浙武宗卽位入爲左丞進右丞至大二年復立尙書省懇辭還家仁宗初召諸臣詣闕議事正上言八事曰守成憲重省臺辯邪正貴名爵正官符開言路慎

賞罰節財用詔集議行之累乞致仕不許拜平章政事時議經理河南江浙江西民田增茶鹽課額正極言其不可弗聽歲大旱野無麥穀種不入土臺臣言變理非人所致平章李孟引咎乞罷平章忽都不丁曰臺臣不能明察姦邪臧否時政可還詰之正言臺省一家當同心獻替豈容分異耶忽都不丁不從丞相鐵木迭兒惡風憲官制已因傳旨言廉訪司權太重故按事失實自今不許專決六品以下官省臣將議行之正言但當擇人法不可易議遂寢延祐六年薨贈宣力贊治功臣光祿大夫司徒柱國趙國公諡曰忠宣子秉德官秘書監丞終安慶路總管秉仁累官工部尙書郝彬字景文霸州信安人也中統初年十六充皇太子宿衛擢揚州路治中宋末鄞賊顧閏據海已附益橫彬討禽之又平泰興冤獄御史薦彬同知淮西宣慰司事覈戶版理屯田諸廢修舉江淮

財賦總管府掌東宮田賦其官屬皆從詹事院奏授不隸中書往往爲姦利誅求無厭彬爲總管入見則請受憲司糾察以革私弊罷所隸六提舉司以蘇民瘼詔罷其四國家鹽利兩淮獨當天下一半法日以壞以彬行戶部經理之彬請度舟楫所通道里所均建六倉煮鹽於場運積之倉歲首聽羣商於轉運司探倉籌定其所乃買券又定江河諸商市易之不如法者著爲令入爲工部尙書徙戶部久之歷江西參知政事至大二年武宗旣復立尙書省聞彬才卽召拜尙書參知政事辭不獲命尙書丞相脫虎脫三寶奴等務生事要功殺及無辜彬積誠開引或從或違橫不可制命加大司徒不拜仁宗在東宮彬懇辭至力因稱疾篤脫虎脫等強起之至奏重賜以餌之彬不爲動遂堅臥一榻足跡未嘗出門未盈二歲仁宗卽位尙書省罷脫虎脫三寶奴等皆伏誅彬不與焉

家居七年仁宗思之以爲大司農尋謝病卒

秃忽魯亦曰秃魯克烈部族也曾祖昔刺斡思勒太祖時兄弟四人早率部屬來歸太祖以舊好遇之命爲必闐赤長朝會燕饗使居上列祖孛魯歡亦曰孛魯合曰不花合憲宗時與忙哥撒兒共掌國政賜東鹿爲食邑至元初以黨附阿里不哥構亂論死父也先不花世其職爲也可必闐赤世祖使爲明孝太子傅後平章雲南政事討平夷亂定其貢賦大德中累遷至湖廣左丞相諡文貞也先不花弟木八剌爲御史中丞季弟不花帖木兒爲四川平章政事秃忽魯一門貴盛以陰翊翔華近累官爲司徒至大初命知樞密院事踰年加左丞相改太府卿皇慶二年代鐵木迭兒爲右丞相秃忽魯爲人厚重常自謹畏爲相方二月卽言臣等職專燮理去秋至春亢旱民間乏食而又隕霜雨沙天文示變皆由不能

宣上恩澤致茲災異乞黜臣等以當天心帝不許未幾六月朔京師地震禿忽魯又上言乞賜放黜延祐元年復以災異乞罷皆不允尋帝以禿忽魯辭位誠切遂以合散代爲右丞相禿忽魯改知樞密院事三年出爲陝西左丞相是時前丞相阿思罕方挾周王以叛陝西震動禿忽魯以靜安之數歲泰定帝卽位召爲御史大夫元年旭邁傑倒刺沙爲左右丞相皆帝舊侍頗任威福國人皆不悅禿忽魯因上言御史言災異屢見宰相宜避位以應天變此其可否宜斷自聖心者也惟臣爲陛下耳目有徇私違法者不能糾察慢法失守宜先退避以讓賢能於是省臣皆自引罷禿忽魯又言臣已老病恐誤大事乞先退帝皆不許明年加太保四年復進位太傅錄軍國重事未幾薨贈太師廣陽王諡清獻禿忽魯頗名爲持正而前以鐵木迭兒之黨後以倒刺沙不能安於其位故意在謙退君子多之禿忽魯兄弟五人兄亦憐真官至湖廣左丞相兄子拜住哥南臺御史大夫拜住哥弟搠思監在權倖傳弟荅思湖南宣慰使怯烈中政使季弟曰按攤按攤子阿榮最知名


阿榮字存初父按攤事成宗襲長宿衛以孝行聞詔特給七乘傳使侍其父也先不花於湖廣尋拜海北海南道宣慰使都元帥海康與安南占城境接海島生黎叛服不常按攤威望夙著夷人帖服生黎王高等二十餘洞皆願輸貢稅在鎮期年以省親辭去至大初拜中書右丞宣慰使行浙東都元帥俄奔父喪於武昌以毀卒贈太保左丞相趙國公諡貞孝阿榮幼事武宗備宿衛累遷湖南宣慰副使溫德亨奉使宣撫湖南事無大小悉以委之會列郡歲饑阿榮分其廩祿爲粥以食餓者仍發粟賑之所活甚眾廣西寇起眾皆恟懼阿榮鎮之以靜督有司治兵守其境寇不敢入遷

湖南行省左右司郎中召僉會福院事尋除吏部尙書泰定初出  
爲湖南宣慰使移宣慰浙東都元帥以疾辭天祿初復起爲吏部  
尙書尋參議中書省事俄拜參知政事知經筵進奎章閣大學士  
太禧宗禋院使都典制神御殿事眷遇甚重頃之心忽鬱鬱不樂  
謁告南歸武昌元統元年卒初阿榮閒居以文翰自娛博究前代  
治亂得失每見忠臣孝子則曰此國家之寶也輒爲之神往暇則  
與韋布之士游所至山水佳處鳴琴賦詩日夕忘返頗深數學至  
順元年春策士於廷與虞集會於直廬慨然興歎語集曰更一科  
後科舉當輟輟兩科而復復則人才彬彬大出矣然君及見之吾  
不復見此矣集應曰今文治方興豈有輟理存初國家世臣嫻於  
文學盛年登朝在上左右斯文屬望集老且衰見亦何補耶阿榮  
又歎曰數當然耳阿榮卒後後至元元年科舉果罷六年乃復如

其言

伯荅沙也可札魯花赤忙哥撒兒孫也忙哥撒兒在權倖傳伯荅  
沙幼入宿衛爲寶兒赤歷事成宗武宗擢光祿少卿遷同知宣徽  
院事進院使遙授左丞相武宗崩奉梓宮葬於北守山陵三年乃  
還仁宗復以爲宣徽使延祐四年合散代鐵木迭兒爲右丞相合  
散言故事右相必用蒙古勳臣合散回回人不厭人望詔遂以伯  
荅沙代合散爲右丞相而以合散爲左丞相時承平日久君臣端  
拱廟堂之上而百姓又安於下一時號爲極治伯荅沙取充位而  
已六年遣持節授皇太子玉冊仁宗崩鐵木迭兒復相改集賢大  
學士開府儀同三司錄軍國重事未幾以大宗正也可札魯花赤  
出鎮北方亦以清靜爲治邊民按堵泰定閒還朝加太保及齊王  
月魯帖木兒兵陷上都天順帝崩伯荅沙奉天子璽綬以上文宗

進位太傅仍兼大宗正也可札魯花赤總兵北邊至順三年薨伯  
荅沙爲人清慎寬厚號稱長者其沒也貧無以爲斂人皆歎其廉  
詔贈推忠佐理正德秉義功臣太師上柱國仍開府儀同三司威  
平王子八郎官至大宗正札魯花赤  
論日記云長國家而務財用者必自小人矣豈不信哉元三立尙  
書省皆致擾亂塔刺海塔思不花乞台普濟務正紀綱不爲利回  
劉正出入炭穴及經懲創色變談虎郝彬毅然以疾避戾亦近乎  
潔清矣禿忽魯伯荅沙雖居高位而大權不屬天傾正統亡也忽  
焉伯荅沙躬奉徽綬惟恐稍後何以名長者哉





曾湘泉

刊

曾清心

門人曾廣休襄校

門人曾士琮詳校

元書卷七十一

元書卷七十二

邵陽曾廉譔

郝劉徐三王張敬曹郭王高列傳第四十七

郝天挺字繼先，朶魯歹氏族也。後居安肅州，父和尙拔都幼爲國兵所掠，見撫於郡王怯台，長通譯語，善騎射。使宋伐金，俱有聲稱。太宗時復從曲出，太子伐襄陽，戰漢水上，又從都元帥達海紺卜征蜀，攻下興元，劍閣抵夔府。太宗命解衣數，其創拜宣德西京太原平陽延安五路萬戶，改爲河北東路行省。憲宗二年卒，贈太保儀同三司、冀國公，諡忠定。諸兒位皆貴顯。天挺少受業於元好問，以勳臣子召見，世祖嘉其容止，命執文字備宿衛東宮。明孝太子遇之甚厚，選爲參議，雲南行省事。拜本省參知政事，改陝西漢中道肅政廉訪使。成宗立，入爲吏部尙書，除西臺御史中丞。久之，改

江浙左丞武宗卽位召爲中書左丞天挺英爽剛直與宰執論事輒面斥之不惜也以奏事明允帝特賜之黃金百兩天挺辭帝曰非利汝也乃旌汝敢言也乃受之然其時中書多冗位議者反以天挺堅執欲出之天挺遂以病告仁宗嗣位與李謙等十人以老成召赴闕尋命爲河南右丞復召拜御史中丞天挺陳紀綱之要以獵爲喻曰御史職在擊姦猶鷹揚焉禽之弱者易獲也其力大者必借人力不然不惟失其前禽且有傷鷹之患矣意蓋欲帝勇於納諫厚護善類以鋤擊邪慝也是時丞相鐵木迭兒專排異己故天挺及之皇慶二年天挺復疏陳七事一曰惜名爵略言先帝卽位之初大事方定故於左右三五有功之人爵之太高遂使近幸之臣因而相襲王公師保接迹於朝比者雖令裁罷曾未經歲又復紛然昔人有言服之不衷身之災也是則朝器重則升斗之

祿足以鼓舞豪傑濫則日拜卿相而人不勸矣一曰久任使以爲國初設官在內須三十月在外須三周歲考其殿最以爲黜陟比者省院臺部之臣久者一二歲少者三五月甚有旬日而數遷易者奔走往來之不暇何暇宣風布化參理機務哉請自今惟大臣可急選授其官屬必候任滿方許超遷以免朝除夕改啟倖長姦之弊其五事曰抑浮費止括田論好事獎農務本勵學養士帝大嘉之詔令中書施行而鐵木迭兒大惡之出爲河南行省平章政事不憐吉歹時方爲河南丞相故丞相阿朮子也累世勳貴然極尊天挺待以師禮由是政化益彰其歲天挺薨贈光祿大夫中書平章政事柱國冀國公諡文定著述具藝文志子祐字君輔亦號爲廉直位終西臺侍御史祐子忠恕官翰林待制上所著無逸圖命總裁三史書成歸隱

劉敏中字端甫濟南章邱人也幼卓異不凡年十三語其父景石曰昔賢足於學而不求知豐於功而不自衒此後人所弗逮也父大奇之敏中嘗與同儕各言其志曰自幼至老相見而無愧色乃吾志也敏中始爲中書掾至元十一年擢兵部主事久之爲監察御史桑哥柄政敏中劾其姦邪不報遂辭歸已而起爲御史臺都事時同官王約以言事去敏中復杜門稱疾臺臣請視事敏中曰使約無罪而被劾我固不當出誠有罪耶則我旣爲同僚又爲交友不能諫止亦不能無過也乃出爲燕南肅政廉訪副使數歲入爲國子司業遷翰林直學士兼國子祭酒大德初以星變敏中上書論事之本政之先其目有七曰畏天敬祖清心持體更化察吏治除民害七年詔遣宣撫使巡行諸道敏中出使遼東諸守令恃貴倖橫暴者一繩以法錦州雨水爲災輒發廩振之除東平總管

擢西臺治書侍御史九年召爲集賢學士商議中書省事敏中上疏陳十事曰整朝綱省庶政進善良剔姦蠹顯公道杜私門廣恩澤實鈔法嚴武備舉封贈武宗卽位召至上都與議庶政加太子贊善賜金幣有加頃之命參知河南政事改治書侍御史出爲淮西肅政廉訪使轉山東宣慰使召拜翰林學士承旨皇慶元年敏中上言陛下卽位之日遵述世祖成憲頒降明詔播告天下至謂除樞密院御史臺徽政宣政二院各依舊制其諸衙門及近侍等敢有擅自奏啟中書政務者以違制論又至元三十年以後諸衙門改升勅設類多冗員非世祖定制應從臺省分別裁罷然則聖意之所以假權中書畀重憲臺者昭然可見矣然欲得患失與喜奪悲人情所同慮或萋菲之言伺便而入浸潤膚受謗歸省臺省臺一搖政本隨易願密遏潛弭則事權自一紀綱自振仁宗深然

其言以疾還鄉里敏中平生義不苟進退必有所匡救又每以時事爲憂或鬱而弗申則戚形於色中夜嘆息至淚濕枕席爲文理明辭備著述具藝文志延祐五年敏中年七十六卒贈光祿大夫柱國齊國公諡曰文簡

徐毅字伯宏霍州趙城人也蚤學於許衡辟同知檀州事有聲至元中擢監察御史上言江南新附未久宜撫卹流亡以固民心京師天下根本宜蠲除地稅以厚德意檢覆災宜以時而發倉廩之儲捐山澤之利申明酒禁以修荒政蠲寡孤獨宜有所養民所疾苦宜遣使詢問又言方今庶政姑息中書親細務而宰相失體諸部寮屬多非其人因陳省臺爲治之要及憲司事宜監治官吏當加儆戒不可因人之誣言而升降諸官其行樞密院行大司農司行通政院及尙書省理算受賞進官者皆可罷又言四川安起邊

釁交趾虛勞王師獻策以邀功生事者宜勿聽官軍子弟以膏粱承襲未嘗知兵宜別議立法至增國子之員重教官之選以興學校治宗廟以崇祀典修國史以存故實設朝三班不可全無流品之分實封陳言勿使苟爲進身之計若選用官吏減錢糧之費理婚田之訟馬禁水利鹽鈔諸法其弊當改者前後七十餘疏皆時切要成宗初卽位毅因言陛下方虛心求治而大臣不肯任事者宰相員太多議論不一故也竊謂宜亟用舊臣伯顏專一任之此逸於信賢之道也又言爲治不在高遠但當遵守舊制其要有四信賢遠佞信賞必罰而已又請建儲貳睦宗藩選臺諫教習親軍勿事西南夷而專備北邊及赦不可數凡二十餘疏累遷河東山西廉訪僉事釋冤獄五百餘人召爲徽政院長史舊例臺察於徽政事一無所問毅言其非有詆之者卽謝去已而除治書侍御史

大臣構害御史郭章毅爲之辯有沮之者又謝去召還歷漢中河南河北廉訪使刑部尙書僉樞密院事參議省事拜西臺中丞毅爲人清方勁正明於治體仁宗時卒贈右丞平陽郡公諡曰文靖王壽字仁卿涿郡新城人也幼穎敏嗜學長以通國書爲中書掾以薦侍明孝太子於東宮甚見禮待至元十九年授兵部員外郎居數歲進吏部郎中既而以分置尙書省革罷其官二十八年罷尙書省復歸中書壽復爲吏部郎中以甥不忽木平章政事卽引嫌自免去明年授大司農丞不赴元貞二年出爲燕南河北道廉訪副使大德二年不忽木行御史中丞壽復告歸明年授集賢直學士秩滿進侍讀學士擢侍御史時不忽木已薨乃就職帝命壽徧祠江南嶽鎮海瀆密旨去歲風水爲災百姓艱食凡所經過采訪人對使還具奏民之利病繫於官吏善惡在今宜選公廉材幹

存心愛物者專撫字剛方正大深識治體者居風憲天災代有振濟以時無勞聖慮惟是豪右之家仍據權要當罷其職處之京師以保全之此長久之道也壽在臺論事剴切久之參議中書省事改吏部尙書武宗卽位首拜御史中丞尋拜左丞方踰月又爲中丞時帝與脫虎脫議復設尙書省壽與臺官奏宰相內統百官外均四海位尊任重不可輕假非人三代以降國之興衰民之休戚未有不由相臣之賢否也世祖初置中書省以忽魯不花塔察兒線眞安童伯顏等爲丞相史天澤劉秉忠廉希憲許衡姚樞等實左右之當時稱治比唐貞觀之盛迨至阿合馬郝禎耿仁盧世榮桑哥忻都等壞法黷貨流毒億兆近者阿忽台伯顏八都馬辛阿里等專政煽惑中禁幾搖神器君子小人已試之驗較然如此臣願推愛君思治之心邪正互陳成敗對舉庶幾上悟天衷懲其旣

往知所進退天下事可從而理也不聽然帝亦頗有所回顧未遂從脫虎脫請也至大二年壽寢疾求代其秋竟復立尙書省脫虎脫三寶奴樂實等皆柄用明年遷壽爲太子賓客集賢大學士是歲卒贈銀青榮祿大夫平章政事上柱國薊國公諡曰文正王約字彥博其先汴人也後徙真定少從魏初游博覽經史工文辭務達國體時好不以動其心至元中以翰林學士王磐薦爲從事和禮霍孫以司徒開府奏授翰林國史院編修兼司徒府掾累遷監察御史首請建儲及修史事時丞相桑哥銜參政郭佑爲中丞時奏誅盧世榮故誣以他罪約上章直佑冤轉本臺都事南臺侍御史程鉅夫入言事多斥桑哥罪桑哥怒又以約與之表裏六奏請並殺之帝不許約以隴西地遠請立行臺陝西從之遷右司員外郎成宗卽位上言二十二事又請中書去繁文而責成於六

部行省調兵部郎中改禮部請行贈諡之典以旌忠勳付時政記於史館以備纂錄立供需府以專供億事皆允行拜翰林直學士知制誥同修國史奉使振京畿東道饑民活五十餘萬人因條陳京東利病十事帝以高麗王昺已傳位子諶而聽羣小離開行賦輦下因諫入朝留之而已復位復以虐政爲國人所愬因遣約驗問約至宣詔而諭之曰天地閒至親者父子至重者君臣彼小人惟知自利豈肯爲汝家國地耶昺泣謝曰臣年耄聽信僉邪是以至此願奉表自雪且乞子諶還國約遂捕按其黨流杖黜有差而以故臣洪子藩知國政罷非道水驛十三免耽羅貢非所產物東民大喜還除太常少卿尋詔同宗正御史讞獄京師約辭職在清廟帝不允乃閱諸獄刑釋稱平又議鬪毆殺人者減死一等著爲令拜刑部尙書成宗崩仁宗至自懷州禽丞相阿忽台等命按狀

約曰在法謀逆不必榜掠竟當伏誅獄遂定仁宗由是知約遷禮部尚書請定丁憂之制申旌表之恩免都城煤炭之徵武宗皆用其言仁宗在東宮思用約以自輔遂擢太子詹事丞進副詹事時承制立左衛率府統侍衛軍萬人護東宮同列欲署軍官約持不可眾難之曰東宮非樞密使耶約曰詹事東宮官可預樞密事乎仁宗復召問約對曰皇太子事不敢不爲天子事不敢爲也仁宗大悟自後常字之不名一日西園觀角觝戲已命取繒帛以賜約入遙見問曰汝何爲來仁宗遽止之又欲觀俳戲事已集以約至而罷其見敬禮如此及仁宗卽位中書奏約參知陝西政事帝大怒然竟以爲河南右丞先是尚書省用建言者冒獻河汴官民地爲無主奏立錢糧府歲輸數萬石是歲詔罷之竄建言者於海外命河南行省還其舊業行省方竝緣爲姦田猶未給及約至立期

檄郡縣釐正如詔會詔更錢銀鈔法且令天下稅盡收至大鈔約度河南歲用鈔七萬錠必至上供不給乃下諸州凡至大至元鈔相半眾以方詔命爲言約曰吾豈不知第歲終諸事不集責亦匪輕也丞相不憐吉歹以爲然遣使白中書遂徧行天下皇慶改元召拜集賢大學士推恩三世贈諡樹碑延祐二年奉使宣撫燕南山東道還拜樞密副使知樞密院駙馬荅失帖木兒方直宿衛帝戒之曰彥博非汝友也當師事之英宗嗣位鐵木迭兒復相約辭職不出遂致仕頃之丞相拜住傳詔起約復拜集賢大學士商議中書省事與修大元通制時朝廷議罷征東省立三韓省盡郡縣其地約曰高麗去京師四千里地瘠民貧夷俗雜尙非中原比萬一梗化疲力治之非幸事也事遂寢年八十二至順四年卒約和粹謙抑祿周姻族祭祀必稽古禮邦人以爲矜式所薦達孛魯

神姚登孫揭侯斯楊靜皆佳士又推揚僚司輔惟良李源曹元用  
 不憐吉歹以勳閎舊德膺受王封亦約所啟也平日論事精確而  
 厚在刑部時有宗王兄弟二人守邊兄陰有異志弟諫不聽即馳  
 去兄遣奴挾弓矢追之弟遂射斃奴兄訴囚其弟獄當死約慮囚  
 曰兄奴即弟奴也况殺之有故乎立釋之在禮部有京師王氏仕  
 江南而歿有遺腹子育於姊子年十六乃訴姊匿父賞有司責之  
 急約視其牘曰孤子育之成人姊恩多矣誠利其賞豈有今日耶  
 改前議而斥之所傳約當獄辭頗多不備載著述在藝文志

王結字儀伯易州定興人也祖逃勤以質子軍從太祖西征娶阿  
 魯渾氏徙戍秦隴又徙中山家焉結嘗從太史董朴受經年二十  
 餘游京師上執政書陳時政八事曰立經筵以養君德行仁政以  
 結民心育英才以備貢舉擇守令以正銓衡敬賢士以勵名節革

允官以正職制辨章程以定民志務農桑以厚民生完澤方為丞  
 相以為常談不甚經意也時仁宗在潛邸或薦結入宿衛乃集歷  
 代君臣行事可鑒戒者日陳於前仁宗嘉納焉武宗即位仁宗為  
 皇太子命置東宮官屬以結為典牧太監近侍以優俳進結言此  
 昔唐莊宗所好也殿下方育德春宮視聽宜謹仁宗尤敬之數年  
 嗣位遷結集賢直學士出為順德路總管教民務農興學孝親弟  
 長戢姦禁暴悉登於善俾朝夕閱習之屬邑鉅鹿沙河有唐魏徵  
 宋璟墓乃祠二公於學表其言論風旨以勵多士歷遷揚州甯國  
 改東昌路境有黃河故道而會通隄遏其下流夏月潦水壞民麥  
 禾結疏為斗門以泄之民獲耕治之利至治二年參議中書省事  
 因謂丞相拜住言為相之道當正己以正君正君以正天下除惡  
 不可猶豫猶豫恐生他變服用不可奢僭奢僭則害及於身拜住

是其言除吏部尙書薦名士宋本韓鏞等十餘人泰定元年廷試進士結充讀卷官遷集賢侍讀學士會有月食地震烈風之異結昌言於朝以爲君子小人混淆刑政不明官賞太濫故陰陽錯謬咎徵薦臻宜修政事以弭天變時初開經筵命張珪及結以帝範資治通鑑大學衍義貞觀政要等書進講結援古訓證時政之失冀帝有所感悟中宮聞之亦召結等進講結以故事辭除浙西廉訪使遷遼陽參知政事入爲刑部尙書文宗初拜中書參知政事是時迎明宗於朔方文宗居皇太子位而近侍有求官賞者結曰當俟天子至議之初上都之變失皇太子寶更鑄新寶近侍請加大結曰此當傳儲嗣不敢逾舊制也或致人於死而籍其妻孥賞產者結復論之近侍益怒遂譖結罷政元統元年召拜翰林學士知制誥同修國史與張起巖歐陽元修泰定天祿實錄拜左丞中

宮命僧尼於慈福殿作佛事已而殿災結言僧尼褻瀆當坐罪左丞相撒敦疾家人請釋重囚禳之結極陳其不可先是有罪者北人則徙廣海南人則徙遼東去家萬里往往道死結請更其法移鄉者止千里外改過聽還其鄉因著爲令職官坐罪者多從重科結曰古者刑不上大夫今貪墨雖多然士之廉耻不可以不養也後至元二年薨贈資政大夫河南江北右丞護軍太原郡公諡文忠撰述在藝文志結立言制行皆法古人張珪嘗言結非聖賢之書不讀非仁義之言不談世以爲知言

張養灝字希孟濟南人也年方十歲卽讀書不輟其父母憂其過勤而止之養灝晝則默誦夜則閉戶張燈竊讀長以才行薦爲東平學正頃之游京師獻書於不忽木不忽木大奇之辟爲禮部令史又薦入御史臺一日病不忽木親至其家問疾四顧壁立嘆曰

此真臺掾也改中書掾選授堂邑縣尹人言官舍不利居無免者竟居之首毀淫祠三十餘所罷舊盜之朔望參者曰彼皆良民而絕其自新之路乎眾皆感泣戒毋負張公有李虎者嘗殺人其黨暴戾為害舊尹莫敢詰問養灝盡禽置諸法一邑以安去官十年猶為立碑頌德仁宗在東宮召為司經未至改文學拜監察御史時議復立尙書省養灝言其不便既立又言變法亂政將禍天下俄竝停院臺選官悉歸尙書養灝遂上時政書其略曰陛下龍飛之初詔中外一遵世祖皇帝舊制而近來稽厥廟謨無一不與世祖異者一曰賞賜太侈貨財非經天降皆世祖銖積寸累而致之百姓罷精殫力而奉之四方萬里之外窮鄉陋邑疫魂嫠婦髮鶴於耕手龜於織采玉者躡不測之淵煎鹵者抱無涯之苦比至積微成巨改樸以文然後得入於官水舸陸輿兵民警衛沒則責償

於見官壞則倍徵於來者其在下者有如是之難乃因一笑一醉之適紛紜賜予豈不灰民心糜國力哉二曰刑禁太疏法者公器將以威姦弼教也比年更有賊敗各以左右賄賂而免民有賊殺多以好事赦宥而原加以三年之中無歲無赦殺人固已幸矣其無辜而死者冤孰伸耶臣嘗在縣見詔赦之後罪囚之出大或讐害事主小或攘奪編氓有朝蒙恩而夕被執旦出禁而夕殺人數四發之未嘗一正厥罪又有始焉以偷終成狼虎之噬遠引虛攀株連根逮故蔓其獄未及期歲又復宥之古之赦令出人不意今詔稿未脫姦民已羣然誦之乘機投隙何事不有以致官不知所畏罪露則逃民不知所愛罅隙益熾甚非導民以善之義也三曰名爵太輕陛下正位宸極皇太子開號東宮以來由大事初定喜激於中故左右之人往往爵之太高祿之太重微至優伶屠沽僧

道有授平章左丞參政者其他因修造而進秩以技藝而得官曰國公曰司徒曰丞相者相望於朝自有國以來名器之濫未有若今日者也夫爵祿人君所以厲世磨鈍若因一時之歡加以極品之貴則有功者必曰吾艱苦如此而得之彼優游如此而得之自今孰肯赴湯蹈火以赴國家之急哉四曰臺綱太弱御史臺乃國家耳目所在近年紀綱法度廢無一存昔在先朝雖掾吏之微省未嘗敢與其選今臺用之官皆從省調夫選尉所以捕盜也尉雖不職而使盜自選之可乎自古姦臣欲固結恩寵移奪威權者必先使臺諫默然乃行其志臣不容不言於未然也五曰土木太盛累年山東河南蝗旱洊臻郊關之外十室九空民之扶老攜幼就食他所者絡繹道路其他父子兄弟夫婦至相鬻爲食者比比皆是當此之時朝廷減膳徹樂去議緩刑停一切不應之役宜也今

朔城中都崇建南寺外則有五臺增修之擾內則有養老宮殿營造之勞括匠調軍旁午州縣或度遼伐木或濟江取材蒙犯毒瘴崩淪壓溺而死者無日無之糧不實腹衣不蔽體萬目眈眈無所控告而董役者惟知鞭朴趣成邀功倖賞因而盜匿公費奚暇計國家之財細生民之力彈哉六曰號令太浮近年朝廷用人縱意調罷有若弈碁其立法行政亦莫不爾雖制詔之下未嘗有旬月期年而不變者甚則朝出而夕改甫行而卽止一人甫仕而代者踵隨廟堂舉措如此則外方諸郡事體可知原其所以致此者蓋由執政褊心自用恃寵大言或急於迎合之私或牽於好惡之過輕率無謀而徒爲是紛擾也七曰倖門太多今天下邪巫淫僧庸醫謬卜游食未作及因事亡命無賴之徒往往依附諸侯王駙馬爲其腹心羽翼中才以下鮮不爲其所惑若闔闔出賴發覺之早

未及生變豈可不爲之寒心也哉八曰風俗太靡風俗者天下之元氣也今以僞相高以華相尚以冰檠爲沽譽以脂韋爲逢時以吹毛求疵爲異能以走勢趨炎爲合變順己者雖跼蹐而必用逆己者雖夷惠而莫容自非確然有守不顧一世非笑者出而正之則未易善其後也九曰異端太橫今釋道蓄妻育子飲醕啗腴萃逋逃游惰之民爲煖衣飽食之計使吾民日羸月瘠曾不得糠粃以實腹藍縷以蓋體今日誦藏經明日排好事今年造某殿明年造某宮凡人迹所到精藍勝觀棟宇相望使吾民穴居露處曾不得莖茅撮土以覆頂托足昔世祖嘗欲沙汰僧道有室者籍而民之後奪於眾口而止臣嘗略會國家經費三分爲率僧居二焉昊天寺無因而火天意昭然已可知矣願竟世祖欲行未及之意一沙汰焉十日取相之途太寬自古未有入狀而爲宰相之理也今

聞結寵入狀以自求進臣不知其可也脫虎脫等以養灑言皆切直遂除翰林待制復搆以罪罷之戒省臺勿復用養灑恐及禍乃變姓名遁去尚書省罷始召爲右司都事遷翰林直學士改秘書少監延祐初設進士科以禮部侍郎知貢舉累拜本部尚書英宗初參議中書省事帝以元夕欲於內廷張燈爲鼇山養灑復上疏諫丞相拜住袖其疏以入略曰世祖臨御三十餘年每值元夕閭閻之間燈火亦禁况闕廷之嚴宮掖之邃尤當戒慎今燈山之構臣以爲所觀者小所繫者大所樂者淺所患者深伏願以崇儉慮遠爲法以喜奢樂近爲戒帝初大怒旣而喜曰非張希孟不敢言卽罷之仍賜尚服金織幣帛以旌其直尋以父老棄官歸養召爲吏部尚書不拜丁父憂未祥復以吏部尚書召力辭泰定元年屢召皆不赴天祚二年關中大旱饑民相食特拜西臺中丞旣聞命

卽散其家之所有與鄉里貧乏者登車就道經華山禱雨嶽祠泣拜不能起天忽陰翳一雨二日及到官禱於社壇大雨如注水三尺乃止禾黍自生秦人大喜時斗米直十三緡民持鈔出糶稍昏卽不用詣庫易之則豪猾黨蔽易十與五累日不可得民大困乃檢庫中未毀昏鈔文可驗者得千八十五萬五千餘緡悉以印記其背又刻十貫五貫爲券給散貧乏命米商視印記出糶詣庫驗數以易之於是吏弊不行又率富民出粟因上章請行納粟補官之令聞民有殺子以奉母者爲之大慟出私錢以濟之到官四月未嘗家居夜卽禱天晝則出振終日無少息遂以勞得疾卒關中人哀之如喪父母至順時贈摠誠宣惠功臣榮祿大夫陝西平章政事柱國濱國公諡文忠著述在藝文志

敬儼字威卿易州人金參知政事嗣暉之元孫也嗣暉傳在金史

曾祖子淵樂陵令祖鑑同知嵩州事其從大父鉉金季進士以文名父元長太常博士儼嗜學善屬文以薦爲殿中知班因著憲章御史大夫玉昔帖木兒器之成宗時連辟太傅太師兩府掾調高郵縣尹選充中書省掾朱清張瑄爲海運萬戶豪縱不法適儼典其文牘因致厚賂儼怒拒之後清瑄誅權貴多以賄敗而儼不與累擢監察御史江浙行省與浙西憲司交章相攻擊命省臺遣官往治之儼與阿兒思蘭海牙偕行議多不合兩上之朝廷卒是儼議遷中書左司都事扈從上京西京賈人有以運糧供餉北邊而得官者盜用至數十萬石以利啗主者匿不發儼按徵之以輸邊數年入御史臺爲都事中丞何瑋與省臣有隙省臣因言當覈臺選儼曰邇者省除吏千餘人臺亦當分別之耶語聞議遂寢至大時擢南臺治書侍御史是時議復立尙書省儼爭之不得遂亦忤

宰臣意適兩淮鹽法久滯乃左遷爲轉運使欲以陷之儼至首劾  
場官之貪污者法旣大行課復增羨至二十五萬引河南參政來  
會鹽筴將以羨數爲歲入常額儼以亭戶凋弊已甚以羨爲額民  
力將殫病人以爲己不可參政從之仁宗嗣位召爲戶部尙書時  
尙書省罷廷議盡革其宿弊儼言遽罷錢不用恐細民失利時不  
用其言以疾辭除浙東道肅政廉訪使遷江西參知政事詔設科  
舉儼薦臨川吳澄金陵楊剛中爲考試官眾稱其得人召爲侍御  
史臺臣有劾去而復職者御史復劾之章再上詔命省院共決儼  
曰如此則臺事去矣遂卽帝前奏黜之因伏殿上叩頭請代帝不  
許拜中書參知政事舊制諸院及寺監皆得奏除僚屬歲久多冒  
濫富民或以賂進儼以名爵當慎惜奏請悉追奪之明年謝病歸  
徙居淮南意免復徵至治泰定閒屢召皆不赴天祿初遣使賜酒

徵爲集賢大學士商議中書省事儼令使者先返而挈家歸易水  
與疾入見賜食慰勞命朝會日無下拜尋拜平章政事復以老病  
辭不許二年傷足告歸家居十餘年痺不能行猶劬書不廢薨贈  
翰林學士承旨光祿大夫柱國魯國公諡文忠子自強位禮部員  
外郎

曹元用字子貞東平汶上人也幼嗜書常讀達曙不寐父宗輔憂  
其致疾止之輒以衣蔽窗默觀之其勤懇如此始以鎮江路學正  
考滿游京師聞復大器之薦爲翰林國史院編修元用卽論僚屬  
非材請較試取其優者以供史職御史臺辟爲掾元用初不習吏  
事而見事明決吏反師之轉中書右司掾與清河元明善濟南張  
養灝同時號爲三俊除應奉翰林文字遷禮部主事改尙書省右  
司都事轉員外郎尙書省罷退居任城久之齊魯閒從學者甚眾

延祐六年起爲太常禮儀院經歷屬英宗躬修祀事銳意禮樂其親祀儀注鹵簿輿服之制多所裁定初太廟九室合享於一殿仁宗崩無室可耐乃於武宗前結彩爲次英宗召禮官集議元用言古者宗廟有寢有室宜以今殿爲寢而更營大殿於前爲十五室帝嘉其議授翰林待制俄命直學士至治三年南坡之亂賊黨遽至京師收百司印趣兩院學士北上元用獨不行曰此非常之變吾甯死不屈從也泰定二年授太子贊善轉禮部尙書兼經筵官遇大朝會爲糾儀官申卷班之令俾以序退爭門而出者有罰又謂大醫儀鳳教坊等官不當序正班當自爲一列後皆行之時宰執有欲罷科舉者元用以爲國家文治所繫不宜輕罷又有欲損太廟之享止存冬祭者元用謂禴祠蒸嘗乃禮經之大者其可惜費而廢禮乎三年帝以日食地震星變求言元用曰應天以實不

以文脩德明政應天之寶也宜擢浮費節財用選守令恤貧民嚴禮祀汰佛事止造作以紓民力慎賞罰以示勸懲皆切中時弊又論科舉取士當革冒濫嚴考覈務得真才朝廷咸是之拜翰林侍講學士仍兼經筵與修仁宗英宗實錄又纂集甲令爲通制譯唐貞觀政要爲國語書成皆行於時天祿二年代祀曲阜孔子廟還以司寇像及代祀祀獻值太禧宗禋院副使缺中書奏以元用爲之帝不允曰此人翰林不可無也將大用之矣會卒帝甚嗟悼詔賜賻鈔五千緡贈正奉大夫江浙參知政事護軍東平郡公諡曰文獻著述在藝文志

郭貫字安道保定人也至元時以才行見推擇爲樞密中書掾累拜監察御史承詔分江北沿河草地劾淮西宣慰使昂吉兒父子專權久不遷調蠹政害民出僉湖南肅政廉訪司事大德間遷湖

北道上言今四省軍馬以數萬計征八百媳婦深入炎瘴萬里不  
 毛之地無益於國又遷江西道入爲御史臺都事歷集賢待制翰  
 林直學士詔與遼陽平章政事別速合徹里帖木兒往鎮高麗召  
 爲河東廉訪副使至大閉仁宗至五臺山貫進見仁宗因問廉訪  
 使滅里吉歹何以有善政左右對曰皆副使郭貫之教也因賜貫  
 馬瑙數珠金織文幣入爲吏部考功郎拜治書侍御史皇慶初擢  
 侍御史遷翰林侍講學士明年出爲淮西廉訪使建言宜置常平  
 倉考校各路農事延祐二年召拜參知政事踰年進左丞改集賢  
 大學士久之除太子詹事貫言皇太子受金寶已三年宜行冊禮  
 又輔導之官宜早選置從之遂遷太子賓客謁告還家至治元年  
 復起爲集賢大學士尋致仕泰定元年召爲翰林學士承旨不起  
 至順二年年八十二薨贈光祿大夫河南平章政事柱國蔡國公


諡文憲貫博學尤精篆籀當世冊寶碑額多出其手焉同時楊桓  
 字武子兗州人中統初爲太史院校書郎以撰儀表銘秣日序文  
 辭典雅賜楮幣千緡拜監察御史成宗卽位疏時務二十事帝皆  
 嘉納遷秘書少監擢國子司業未上卒桓博覽羣籍亦精篆籀之  
 學以辨秦璽文名於時云

王毅字栗夫其先平原人祖父始遷汶上遂爲汶上人早歲舉令  
 史大德末爲燕南河北肅政廉訪僉事仁宗藩懷過眞定命毅諭  
 州縣撤供張華侈者能達王旨至大中累官至集賢學士延祐二  
 年改御史中丞乞歸養親不許遷集賢大學士三年以爲中書左  
 丞改江浙左丞未行明年遷平章政事其歲姦臣鐵木迭兒方以  
 臺官言罷相中外愉快數歲復以爲太子太師毅伏闕極諫言鐵  
 木迭兒逞私蠹政難任師保恐爲將來莫測之禍不報毅懼復以

親老乞養從之仍賜其父玉幣而玉仍命毅服官勵其忠也明年仁宗崩至治元年英宗起壽安山佛寺御史索咬兒哈迷失以進言譴死毅復力爭不聽而鐵木迭兒復相既與蕭楊賀之獄凡有前嫌皆在必報遂以帝命毅及高昉徵理在京諸倉庫糧帛虧額毅知鐵木迭兒意在聚斂又欲假此相陷害也欲以計緩而弭之鐵木迭兒遂大譙讓以爲失陷國儲罪不赦也欲殺之丞相拜住密言於帝曰論道經邦宰相事也以金穀細務責之可乎帝然之俱得不死乃遂免去毅清正敢言士林交美泰定帝立御史言罷免王毅高昉張志弼天下咸知其冤詔存者召還錄用於是毅遂還朝以爲翰林承旨數歲遷大司農天祿二年復平章政事薨高昉字顯卿大名元城人也大德中爲右司員外郎御史謝讓舉之遷禮部侍郎命治江南白雲宗獄白雲宗獄者釋教之別傳也是時浙西白雲宗強梁富人相率出厚貲要權貴稍依傍釋教立官府部署其人煽誘劫持合其徒數萬凌轢州縣爲姦利不法昉以戶部令史蘇志道從推勘幽隱凡田廬資賄當沒入者鉅萬沒入之良家子女當還民間還之閱二歲使志道五往返京師始以其獄上遂罷江南白雲宗都僧錄司貧弱獲蘇昉之力也至大初昉參知江浙政事有旨範京城新寺供佛銅器以行省督視期迫不能具或謂宜省庫錢以充用昉曰歷代錢貨孰敢擅毀有頃詔發庫錢與楮幣竝行眾方服昉之識海舶歲運米數百萬石以食京師官給道里費朝以昉領其事分毫悉給於民昉以官吏出入風濤請優其序遷以勸來者著爲令進本省左丞江左繁富中外徵求百至昉熟知利害務簡靜不擾以是民用甯一旋入參知政事改集賢學士出爲南臺侍御史延祐三年復召參知政事明年

爲左丞五年轉右昉以廉能名又天性忠讜不避權貴與王毅俱以論鐵木迭兒積恨免秦定初以御史言起平章湖廣政事先是兩廣蠻獠岑世興累歲爲寇昉因請遣使招諭之遂入朝貢朝廷賜玉帶以旌昉功薨於位諡曰文貞其時有曹鑑至治初爲江浙左右司員外郎詔治白雲宗田稽檢有方不數月而事集亦無纖毫擾人甚稱之鑑字克明宛平人也始用薦爲淮海山長南臺辟爲令史除興文署令命爲安南使伴送沿途問難唱和應荅如響自江浙移湖廣左右司時行省丞相忽剌歹怙勢恣縱僚屬皆畏之鑑獨當官而行不爲回撓湖北臺司舉鑑堪居風憲不報天祿初調江浙財賦府總管屬時大水鑑損其賦十六七勢家因欲詭免鑑則覈實諭令首輸數年遷同僉太常禮儀院鑑習典故達古今禮樂度數名物罔不周知因集議明宗皇后祔廟事援禮據經辯析詳明君子多之後至元元年進禮部尙書卒贈譙郡侯諡文穆鑑天性純孝誼篤親族厯官三十餘年僦屋以居歿之日家無財惟蓄書數千卷皆鑑手校定鑑爲詩賦尙騷雅作文法西漢每篇成學者爭相傳誦著述具藝文志

論曰天挺四朝老成陳紀綱以正朝廷敏中毅壽約結皆剴切匡救渙然水釋養灑剛直被錮敬儼以忤見陷元用死不從亂郭貫王毅高昉力摧權蠹皆勁節之士剛而能溫所謂鼎玉鉉者乎約善處人父子君臣之間中外宮闈皆受其福賢哉



曾玉成

曾湘泉 刊

曾清心

門人曾紀芬襄校

門人曾士琮詳校

元書卷七十二

元書卷七十三

邵陽曾廉撰

旭邁傑倒刺沙荅失帖木兒兀伯都刺月魯帖木兒鐵木哥馬札兒台囊加台列傳第四十八

旭邁傑亦曰旭滅傑失其氏族初事泰定帝於晉邸以嚴見憚至治之末御史大夫鐵失將謀逆遣幹羅思以其事告倒刺沙曰無使旭邁傑得聞也泰定帝即位旭邁傑為宣政院使尋知樞密院事遂拜右丞相兼阿速衛達魯花赤帝之討諸逆也旭邁傑實馳至上都誅鐵失荅失兒赤因帖木兒脫火赤章台等並戮其子孫而籍其產旭邁傑又言諸宗王能自拔逆黨盡忠朝廷者惟有買奴請加封賞以示激勸買奴由是得封為泰甯王泰定元年災異屢見御史上言宰相宜避位以應天變御史大夫禿忽魯因先乞

退而中書諸臣元伯都刺張珪楊廷玉遂皆抗疏乞罷於是旭邁  
傑及左丞相倒刺沙言比者上天示警陛下以憂天下爲心反躬  
自責脩德慎行臣等才識昏庸當國大任無所贊襄以致於此罪  
宜黜退非關諸臣也帝並不許二年旭邁傑請減廢馬汰衛士及  
節諸王濫賜復以歲餼請罷皇后上都營繕皆從之是歲薨旭邁  
傑雖果毅而夙無公輔望惟以恩舊致位右地先朝者臣多嫌其  
躡進故皆退避欲以動之旭邁傑不得已始乞策免非本懷也然  
贊帝分別忠姦能申明大義正名討賊旭邁傑有力焉又務守法  
度期安元元以裁減冗費爲人所疾而衛士殺人於桓州及蒙古  
千戶奪朱甲妻女旭邁傑頗庇之遂大致人言以此爲損焉  
倒刺沙回回人也兄曰馬某沙武宗初爲拱衛直都指揮使以角  
觝屢勝遙授平章政事久之爲湖廣右丞而倒刺沙事晉王爲內

史晉王甚信任之倒刺沙乃以其子合散事丞相拜住得入宿衛  
以刺探朝廷事既而合散歸言御史大夫鐵失與拜住忤恐有事  
變未幾鐵失逆謀已定遣幹羅思來告晉王竝以告倒刺沙晉王  
囚幹羅思而上變不及俄而立爲皇帝遂以倒刺沙平章政事馬  
某沙知樞密院事尋以討賊功進倒刺沙爲左丞相馬某沙爲御  
史大夫泰定元年擢經筵倒刺沙與平章政事張珪同領經筵事  
明年改御史大夫逾月復爲左丞相加開府儀同三司錄軍國重  
事是時旭邁傑薨倒刺沙以回回不得爲首輔於是知樞密院事  
荅失帖木兒代爲右丞相然事多決於倒刺沙其歲馬某沙復加  
開府儀同三司兄弟竝偏蒙厚寵矣三年倒刺沙及省臣同言郡  
縣旱蝗良由臣等不能調變今當恐懼儆省亦冀陛下敬身修德  
憫恤生民又言國用不繼陛下當法祖宗之勤儉以爲永圖臣等

在職苟有濫承恩賞者必不惜回奏又以賜大天源延聖寺田千頃上言養給軍民必資地力世祖建大宣文宏教等寺賜之永業當時已號虛費成宗復造天壽萬甯寺用倍之武宗有崇恩福元仁宗有承華普慶租榷所入抑又甚焉英宗鑿山開寺損兵傷農而卒無益夫土地祖宗所有子孫當共惜之臣恐茲後藉爲口實妄興工役邀福利以逞私欲也惟陛下察之帝皆嘉納焉然倒刺沙實庸鄙無器局多私其親黨行不能如所言又以得君輒自作威福御史臺逮參知政事楊廷玉倒刺沙助廷玉欲陷御史賴張起巖三上章爭之乃解事在起巖傳由是政多不平而帝益禮顧之四年江南旱蝗倒刺沙及省臣求解職帝皆不許皇子入的麻亦兒監卜爲晉王晉龍潛號也地臨邊多事而王幼乃以荅失帖木兒倒刺沙領內史府四斡耳朵事藉以重之然倒刺沙亦自知

爲人所疾致和元年與荅失帖木兒言災異由諸罪廢官怨怍所致請量才錄用苟欲以消怨蒙古人尤讎視之無何帝崩於上都倒刺沙與梁王王禪遼王脫脫及荅失帖木兒奉遺詔其輔少主踰月天順帝立會同僉樞密院事燕鐵木兒反納懷王於大都以拒天子因指名倒刺沙兀伯都刺爲姦臣於是倒刺沙卽殺諸王滿禿阿馬刺台等十八人以絕內應而與諸王王禪大臣荅失帖木兒等大發兵共出征討既而王師屢敗於昌平倒刺沙無大略諸王大將不相統一多浪戰無所明功罪然諸路勤王之師東西皆至大都南逼汴梁皆忠勇奮發事幾濟而齊王月魯帖木兒以兵自遼北襲上都倒刺沙兵皆付他將不能禦上都遂陷天子崩遼王脫脫及難倒刺沙被禽至燕及其子潑皮木八刺沙皆見殺倒刺沙磔尸於市馬某沙亦死皆追理其家資天祿二年翰林國

史院言纂修英宗實錄請具倒刺沙款伏狀付史館從之蓋欲坐  
倒刺沙通逆謀以歸惡秦定也

荅失帖木兒不知其氏族或又稱爲駙馬亦不知其尙何王女也  
荅失帖木兒自仁宗初知樞密院事尋以黨於脫虎脫三寶奴中  
書奏用參知河南政事御史以其挾勢害民奏罷之久之爲西臺  
御史大夫英宗初復知樞密院事封薊國公秦定時拜右丞相開  
府儀同三司上柱國錄軍國重事帝崩以首輔受顧命貳於文宗  
文宗以爲知樞密院事天祿二年御史言付之兵柄非便詔罷其  
職未幾起爲江浙左丞相元統二年入爲太禧院使議軍國重事  
至正時拜遼陽左丞相御史烏古孫良植上疏曰荅失帖木兒昔  
事晉邸位百僚上受任託孤乃陰蓄二心南至紅橋逗留不進致  
干敗亡覲面入降反藉口矜爲己功視桀之丁公罪又甚焉天祿

初又復賄賂權門流毒江浙今仍移治遼陽夫賣君賣國之臣設  
使已死猶宜追討况久遁天誅稽國法邪正不辯恐姦賊接迹非  
國家之福也詔卽奪其官爵時人以良楨爲直筆焉其時出征死  
者梁王王禪湘甯王八刺失里在世祖九王傳汝甯王忽刺台陽  
翟王太平在三宗諸王傳又有駙馬孛羅帖木兒及乃馬歹乞赤  
紐澤蒙古塔失雅失帖木兒撒兒封溫阿刺帖木兒之屬其降者  
復有若不花欽察台之屬

乃馬歹秦定帝卽位爲右丞元年進平章政事御史董鵬南劉潛  
等上言乃馬歹黨附逆徒身虜臣節乞定其罪以銷天變不報三  
年兼知樞密院事遣簡閱邊兵致和元年敗於宜興大都將脫脫  
木兒禽而殺之

乞赤延祐六年以參議省事進參知政事英宗卽位罷爲集賢學

士秦定時爲太子詹事天順帝立及大都兵遇於宜興戰死

紐澤累官通政院使泰定帝立遷御史大夫元年以天變同御史大夫禿忽魯乞避位帝不許二年兼知樞密院事加開府儀同三司明年爲右御史大夫紐澤在泰定世恩禮最爲優渥天順帝立及右丞相荅失帖木兒太尉不花平章政事買閭等以兵次榆林紐澤尋爲大都所虜遂見殺

蒙古塔失雅失帖木兒撒兒封溫阿刺帖木兒皆失其氏族仕履天順帝立蒙古塔失雅失帖木兒時爲平章政事撒兒封溫爲將作院使及駙馬孛羅帖木兒以兵入古北口爲燕鐵木兒敗於牛關山被禽斬之大都中書遂言上都諸王大臣不思祖宗成憲惑於姦臣倒刺沙輒以兵犯京畿今孛羅帖木兒蒙古塔失等旣正典刑宜傳首四方以儆眾懷王從其言皆傳首焉阿刺帖木兒時

爲樞密副使及指揮使忽都帖木兒以兵會梁王王禪之師戰於紅橋俄爲大都兵追及於紫荆關見殺

不花不知其氏族蓋居於興和嘗及事世祖仁宗時遙授左丞相尋拜太尉泰定元年與平章政事卽烈矯制強醮寡婦被鞫詔以世祖舊臣原之御史言不花卽烈矯制亂法請正其罪帝不允天順帝立不花及右丞相荅失帖木兒駐師榆林尋皆降於大都仍領兵焉然不花惟事剽掠夫擾居庸以北俄被盜殺於家興和路當盜罪死刑部議曰不花不道眾所聞知本路隱其剽掠獨以盜聞非法之平也文宗嘉其議命更正之

欽察台亦失其氏族累官知樞密院事英宗時中政使咬住希寵謀傾懷王欽察台性巧譎陰和之至治三年英宗以爲宣政院使嘗自傳旨署事中書奏論之天順時倒刺沙使之領兵征大都欽

察台實持兩端徘徊觀望倒刺沙覺而欲收之欽察台佞口善說辭得釋遂奔大都以降是時文宗多行拊接又以其盛陳功德喜焉卽命平章政事以御史大夫紐澤田宅賜之天祿二年復知樞密院事尋仍平章政事兼度支監至順元年又兼領長甯卿尋爲御史論罷籍其家欽察台卽蠱他御史爲之言天祿初在上都與闊闊出等謀執倒刺沙事泄同謀者皆死欽察台以出征獲免頃臺疑而劾之不稱事情宜雪其枉帝卽從之明年欽察台以名園爲獻命御史臺給贓罰鈔千錠酬其直尋命平章四川政事御史張益等乃言欽察台昔與咬住造謀誣告脫歡察兒事連潛邸致出居遠海及天祿初倒刺沙知其有異志欲治之又追言咬住之謀以自解皇上卽位不念舊惡擢居中書自貽厥咎復致奪官籍產今又釋宥使泄四川四川與雲南接境雲南未平而以反覆不

可信之人任其事非所以重邊圉也詔乃奪其制命金符竝妻子禁錮廣東免籍其家仍詔御史凡僉人如欽察台者言之無隱久之復貢緣入朝知樞密院事至正九年復平章政事薨

兀伯都刺亦曰烏伯都刺亦回回人也父亦福的哈魯丁翰林學士承旨贈大司徒吉國公諡忠簡兀伯都刺累官至治書侍御史武宗立命參知政事進左丞出行省事於陝西仁宗時召與諸老臣議事尋爲右丞進平章政事改集賢大學士復平章政事英宗初出平章甘肅政事徙江浙泰定帝立復入仍舊官兀伯都刺與倒刺沙皆籍西域兀伯都刺歷事五朝倒刺沙以其習朝廷事倚重之兀伯都刺亦以倒刺沙承主眷交相市也先是回回人嘗鬻寶貨於京師價不貲其異石名曰攔估至鉅萬自成宗時有進獻內府或未酬直而其時諸有過爲司憲奪官者亦多出其門下求

幹旋一日兀伯都刺自禁中出至政事堂集宰執僚佐以詔草示左司都事宋本使讀之乃以星孛地震赦天下仍命中書酬累朝所獻各直竝擢用自英廟至今爲憲臺奪官者本爭曰今朝廷以災異加恩天下徒畏賈人憤怒耶此有司細故形之王言必貽笑天下司憲褫有罪者官世祖成憲也今上御位首詔法世祖今擢用之是廢前憲而反汗前詔也後復有邪佞賊穢者將治之耶置不問耶諸宰執皆歎息罷去兀伯都刺竟不從其言明日遂宣詔宋本由是稱疾不出兀伯都刺亦乞以疾解政不許致和元年倒刺沙從帝如上都兀伯都刺居守俄而燕鐵木兒反卽以兵禽兀伯都刺據大都以迎附懷王尋殺兀伯都刺而爲詔指目爲姦臣又言凡回回種人不與其事者各安業勿懼以慰安之焉俄復命追理兀伯都刺家貲其時爲燕鐵木兒所執者平章政事伯顏察

兒左丞宋朵參知政事王士熙參議省事脫脫吳秉道侍御史鐵木哥邱世傑治書侍御史脫歡太子詹事王桓等凡十人皆閉諸獄懷王入大都鐵木哥與兀伯都刺俱死伯顏察兒朵朵王士熙等各流遠方籍其家尋命給還伯顏察兒家貲明年皆徵還放歸田里尋復起錄用伯顏察兒納速刺子子賽典赤瞻思丁孫也事附瞻思丁傳王士熙王構子也事附構傳朵朵泰定元年自南臺中丞參知政事三年進左丞放還後至正時官陝西平章政事終中書平章政事吳秉道累官秘書卿泰定二年奉使宣撫京畿還朝致和元年命參議省事兼經筵官鐵木哥累官至山南廉訪使疏請削降鐵失所用驟升官爲小人所疾尋召爲侍御史史皆不具始末餘人竝失其事故不傳是時抗拒懷王被殺者復有河南平章政事曲烈右丞別鐵木兒參知政事脫孛臺皆以河南平章

政事伯顏附懷王反不肯從同死其被執者則有馬合某初爲山東鹽運司判官泰定元年爲吏部尙書佩虎符奉卽位詔以諭安南明年參知湖廣政事奉使宣撫兩浙上疏劾廉訪使完者不花之罪尋進湖廣左丞懷王出自江陵湖廣宗藩及省僚皆降馬合某不肯附執之尋燕鐵木兒爲之請而釋之又有撒忒迷失者英宗卽位知樞密院事泰定元年命率衛士佐太師按攤出行邊三年出爲嶺北平章政事懷王立以不附已與梁王王禪倒刺沙馬某沙紐澤也先帖木兒同日見殺當是時拒伯顏被竄者復有月魯帖木兒

月魯帖木兒卜領勒多禮伯臺氏曾祖貴裕事太祖管領怯憐口怯辭官祖合刺嗣其職父普蘭奚成宗時官中書右司郎中武宗以爲山北遼東道肅政廉訪使月魯帖木兒幼警穎與丞相合刺

合孫子同入國學合刺合孫欲用爲中書蒙古必閣赤輒辭問所欲曰欲爲御史耳人壯其志仁宗世拜監察御史巡按上都是時太師鐵木迭兒氣燄薰灼月魯帖木兒劾奏其受富民張弼賕六萬貫曲爲貸死帝怒碎太師印而賜月魯帖木兒鈔萬貫除兵部郎中歷殿中侍御史給侍中左侍儀同修起居注右司郎中一日帝御便殿顧近臣曰朕聞前世皆有太上皇今皇太子且長可居大位朕欲爲太上皇與若等游觀西山以終天年不亦樂乎御史中丞蠻子翰林學士明里董阿皆稱善月魯帖木兒獨起拜曰臣聞昔之所謂太上皇者若唐元宗宋徽宗皆當禍亂不得已而爲之者也陛下位天位以保萬世無疆之業前代虛名何足慕哉帝大然之仁宗崩鐵木迭兒復相欲誣月魯帖木兒以罪不得乃出爲山西鹽運副使丁外艱服除擢山南江北肅政廉訪使泰定初

遷汴梁路總管調武昌以養親不赴致和元年帝崩河南平章政事伯顏矯制起爲本省參知政事謀共將兵劫戴懷王月魯帖木兒固辭曰懷王北還問參政受命何人則將何辭以對伯顏怒會明里董阿南迎懷王過汴梁月魯帖木兒向與有隙因說伯顏收之丞相別不花等亦皆惡月魯帖木兒遂謫乾甯安撫司安置至順三年乃移雷州順帝至元六年始召還數年累遷翰林學士知經筵事至正十二年以江南盜賊充斥命平章江浙政事月魯帖木兒召募民兵號令明肅統師次建德禽斬盜首何福於市遂復純安等縣俘獲萬餘人復業三百餘家是年七月次徽州卒於軍鐵木哥荅魯氏乃蠻國族也泰定時平章陝西政事天順帝嗣位懷王據大都使召鐵木哥及西臺治書侍御史馬札兒台不應復使前西臺御史刺馬黑巴至陝西說之鐵木哥馬札兒台等斬刺

馬黑巴而大發兵以勤王當是時陝西行省長則鐵木哥行臺長則御史大夫也先帖木兒鎮守宗藩則靖安王闊不花而荆王也速也不干在甘肅爲尊屬乃推以主兵分三道竝進荆王靖安王由中道破潼關陝州進克虎牢轉戰而北也先帖木兒自北道從大慶關濟河破河中大都將萬戶徹里帖木兒軍潰也先帖木兒盡更河東諸官吏轉戰而東鐵木哥自南道破武關敗萬戶楊克忠之兵進克鄧州遂入襄陽江鄂大震是時諸路義師獨秦人有法度亦忠憤爲諸軍冠旣而上都陷荆王也速也不干以天子已殉社稷乃傳檄罷兵鐵木哥不得已亦西還文宗以其效忠亦不之罪也至順二年雲南始奉新命詔以鐵木哥平章雲南政事節制境內軍馬後至元四年召入平章政事尋復出鎮至正六年復平章政事踰歲爲南臺御史大夫十二年乞致仕不允以爲甘肅

平章政事薨子普化帖木兒在忠節傳也先帖木兒至潞州聞上都  
都不守而降文宗以其前殺官吏遂殺之其時遼東則有禿滿迭  
兒

禿滿迭兒英宗初為平章政事一月罷為宣徽使泰定元年為太

子詹事御史董鵬南劾其附逆當刑帝不允尋遷平章政事並宣

徽使懷王稱兵朝議以禿滿迭兒平章遼東政事遂從營王也先

帖木兒起兵入遷民鎮進克通州遂至大都尋為燕鐵木兒所敗

禿滿迭兒復入古北口再敗於檀州南遂還遼東懷王既陷上都

購能執梁王王禪及禿滿迭兒者授官五品後不知其所終

馬札兒台蔑兒吉歹氏即蔑里乞部族也自其曾祖探馬哈兒給

事宿衛祖稱海從憲宗伐宋歿於王事父謹只兒三世皆贈諡封

王馬札兒台早偕兄伯顏扈從武宗復事仁宗於潛邸恭謹敏達

仁宗悅之及立為皇太子以為典用太監遷兵部郎中累進兵部

尚書典瑞院使歷大都路達魯花赤佩虎符領虎賁親軍都指揮

使泰定四年拜西臺治書侍御史致和元年帝崩而燕鐵木兒反

遣使迎懷王入大都伯顏素黨於燕鐵木兒遂自河南帥師從懷

王北行懷王即使召馬札兒台及鐵木哥皆不奉命並殺使者刺

馬黑巴事在鐵木哥傳既而懷王即位遣使頒詔甘肅至陝西馬

札兒台及行省官復塗毀其詔書械使者而送於上都俄而上都

淪亡廷議陝西省臺官罪皆流天祿二年伯顏已以翊戴功為左

丞相詔特免馬札兒台罪徵為上都留守久之拜御史大夫遷知

樞密院事兼鎮守海口侍衛親軍屯儲都指揮使司達魯花赤順

帝即位伯顏為右丞相當國議封馬札兒台王爵馬札兒台辭以

為伯顏既封秦王兄弟不可並王也乃拜太保分樞密院往鎮北

邊居數歲伯顏以專悖著帝不能忍馬札兒台子曰脫脫陰與帝謀去其逼乃黜伯顏而以馬札兒台代爲右丞相加太師馬札兒台性恭厚晚歲不能釋於財非大臣體脫脫亦微諫之馬札兒台遂以疾辭政帝優詔起之固不起遂以太師就第初伯顏之貶也卽命封馬札兒台爲忠王加號荅刺罕不受御史普魯台言宜成其志而示天下以勸廉讓從之至正元年詔仍封爲忠王七年別兒怯不花爲右丞相與脫脫有隙會脫脫亦辭位別兒怯不花遂譏馬札兒台於帝詔免太師安置西甯復命徙於西域撒里尋召還甘肅薨十二年詔追封德王賜之碑曰旌忠昭德之碑子二人脫脫弟曰也先帖木兒脫脫自有傳其時不赴文宗召者又有也兒吉尼

也兒吉尼武宗初同知樞密院事遙授左丞相進知樞密院事至

大元年加遙授右丞相英宗卽位命往驗覈鞏昌等路屯戍選甘州戍卒還朝以爲江西平章政事泰定時召復知樞密院事尋出爲雲南右丞相文宗入大都遣使召之不至上都尋亡文宗召之復不至然也兒吉尼由是生心徐圖自歸於大都至順元年雲南諸王荅失不花秃堅不花及平章政事馬忽思因數其非將殺之也兒吉尼遂遁走火番以歸文宗文宗喜其至以爲翰林學士承旨尋復知樞密院事加太尉賜銀印薨

囊加台也速荅兒子也事並具其祖紐璘傳囊加台以世襲萬戶累官四川平章政事泰定元年嘗兼宣政院使征西蕃參卜郎致和元年文宗之立囊加台心非之陝西舉義兵平章政事鐵木哥出武關下襄陽囊加台遙與之應大都恐乃增兵以守歸峽而囊加台倉卒未能出師旣而聞上都已亡囊加台堅不欲事文宗又

自以爲世將材武過人且師出有名遂與其省左丞脫脫前雲南廉訪使楊靜謀發兵北向平章政事實徹不從殺之遂自稱鎮西王而以脫脫平章政事楊靜爲左丞作檄暴文宗罪惡於四方時惟烏蒙教授杜巖有言曰方今聖明嗣統宇內大甯省臣當罷兵入朝庶免一方之害也囊加台怒以爲妄言惑眾杖而禁錮之遂燒斷棧道以絕秦兵而分兵出大江南北明年南攻播州破苗兒壩宣慰使楊燕里不花開關納之北師循漢下金州據白土關而分兵以向襄陽是時月魯帖木兒王統蒙古漢軍五萬人扼烏江斷囊加台入順元之路樞密院復請調鎮西武靖王搠思班等軍禦之未幾楊燕里不花降於月魯帖木兒王囊加台始意欲拊奉元之背而擣荆襄以南控楚粵北蹂宛汴皆爲湖廣陝西軍所拒不得前銳氣漸挫又聞明宗已正位人心嚮之知不可以爭也亦

會朝廷遣湖廣政事孛羅傳詔曲赦其罪囊加台遂罷兵聽命其歲明宗崩文宗自旺忽察都還至上都坐囊加台以指斥乘輿大不道殺之明日始復卽位俄命籍其家楊靜等皆杖流遼東楊靜者成都儒士始以河南右丞王約與國子監博士姚登孫應奉翰林文字揭傒斯同薦除官累遷至雲南肅政廉訪使至正時自竄所放還以壽終囊加台子荅失又都魯自有傳囊加台旣死而雲南諸王禿堅與其弟必刺都迷失必刺都古彖失及其將伯忽阿禾等復起兵抗新命事在世祖九王傳伯忽阿禾皆力戰死以均失其事故不傳

論曰元自憲宗以勢力勝負相君臣泰定帝當時所與共國者何人也焉不危哉然天下非不思天順也曲烈別鐵木兒脫孛臺等抗節以死而史無可考之遺蹟月魯帖木兒甘從削竄無爲表章

馬札兒台傳且以毀書斬使為諱然則忠臣義士之多所沈歿其可知矣若夫順逆昭然仗義以討賊豈非人臣之正而也先帖木兒囊加台之徒始不能急於赴難終不能遽自裁決故生者幸生死亦幸死耳元黃奇變曾無一烈男子碎齒噴血其史氏之缺耶抑皆誤於夏侯詳之說也其有愧於王思同也多矣

劉澄刊

劉潛

門人曾紀元襄校

門人曾士琮詳校

元書卷七十三

元書卷七十四

邵陽曾廉撰

趙世延張思明阿禮海牙孛魯朮虞集歐陽元列傳第四十九  
趙世延字子敬自其祖按竺邇家於成都遂為成都人也按竺邇有傳世延天姿秀發弱冠世祖召見俾入臺院習肄官政始授雲南按察司判官數歲擢監察御史與同列五人劾丞相桑哥中丞趙國輔抑不以聞至元二十九年僉江南湖北肅政廉訪司事敦儒學立義倉撤淫祠脩澧陽壞隄嚴常澧賂賣良民之禁部內晏然大德三年為中臺都事數年歷山東肅政廉訪副使南臺治書侍御史久之除安西路總管至大元年徙總管紹興改四川肅政廉訪使蒙古軍士科差繇重而軍士就戍往來者多害人軍官或抑良為奴世延皆除其弊而正其罪又脩都江堰以便民尋移西

臺侍御史拜江浙參知政事復召爲侍御史延祐元年省臣奏比奉詔漢人參政用儒者趙世延其人也帝曰世延誠可用然雍古氏非漢人也遂拜參知政事踰歲改御史中丞有旨省臣自平章以下率送之官其禮向未有也帝欲以臺綱責之世延右丞相鐵木迭兒益深忌之乃以皇太后旨出爲雲南右丞陛辭帝命仍爲中丞然世延終以皇太后故不敢卽論鐵木迭兒四年御史中丞楊朵兒只及平章政事蕭拜任上都留守賀勝乃其論之事各在其傳中世延及內外御史四十餘人亦疏其不法數十事鐵木迭兒由是罷相帝亦不能明正其罪也世延懼五年遂乞外拜四川平章政事卽重慶路立屯田得江津巴閒田七百八十三頃摘軍千二百人墾之歲得粟萬餘石世延出二歲而仁宗崩鐵木迭兒以皇太后旨復相銳意報復已殺蕭拜任楊朵兒只英宗卽位又

殺賀勝而世延在遠難驟致之法乃使人誘世延從弟胥益爾合忽誣告世延罪逮對志必殺之世延至夔遇赦乃以疾抵荆門就醫鐵木迭兒督追至京繫之刑曹數逼令自裁世延不爲動也囚三歲胥益爾合忽自以所訴涉誣罔丞相拜任屢爲之言鐵木迭兒又已死世延遂出獄先是帝獵北涼亭顧謂侍臣曰趙世延先帝所尊禮鐵木迭兒妄入其罪數請誅之此殆報私怨耳侍臣皆叩頭稱萬歲於是世延遂出居金陵泰定元年召爲集賢大學士明年以爲南臺中丞四年復還爲中臺中丞又遷右丞致和元年命中書徧移天下雪其非辜又兼翰林學士承旨兼知經筵竝同知樞密院事俄而帝崩太子幼同僉樞密院事燕鐵木兒欲擅援立功乃迎懷王於江陵世延實盡力爲之贊畫文宗卽位仍爲中丞兼承旨天祿二年又兼奎章閣大學士尋拜平章政事詔以世

延年高許乘小車入禁中至順元年領纂修經世大典事請致仕不允仍兼承旨封魯國公太師燕鐵木兒爲之言向有旨惟臣與伯顏許兼三職今世延亦然故引疾以辭帝曰朕重老成人其令仍視事是時御史葛明誠惡世延失節而難爲辭乃上言世延年踰七十智慮衰耗固位苟容乞斥歸田里燕鐵木兒曰世延屢乞休而聖意慰留御史固不知前有旨也帝曰如御史言世延固難任中書矣其位以翰林奎章可也於是世延遂移文中書徑行養疾於茅山二年改封涼國公元統二年詔賜錢四萬緡後至元元年仍除奎章閣大學士翰林學士承旨中書平章政事魯國公明年還成都薨至正二年贈執法佐運翌亮功臣太保金紫光祿大夫上柱國諡文忠世延歷事九朝敷歷省臺五十餘年以文學知名然始著風節晚更結燕鐵木兒成其邪謀又爲設鴛鴦會以媚

之文宗陽以宿儒尊之實德其定策之功以是戀棧苟祿列於彈章君子薄焉子五人野峻台別見忠節傳伯忽夔州路總管四川平章政事囊加台舉義爲所殺文宗贈以中書右丞蜀郡公諡忠愍當燕鐵木兒謀變其日同附和者尙有別不花塔失海牙速速王不憐吉台亦列赤寒食之屬亦列赤忙兀台子也事附忙兀台傳

別不花不知其氏族父卜花朮見害於禾忽大王贈太保延國公加贈太師居延王諡忠節武宗初別不花爲集賢院使徽政院使瓜頭言別不花以私錢建寺爲國祝釐乞賜以禾忽所得歲賜命以五年與之尋命平章政事加太尉出平章江浙政事徙江西爲左丞相至大三年來朝賜以世祖宮人寵賚有加焉旋徙爲湖廣左丞相以賊免官致和元年燕鐵木兒謀變於大都首推爲左丞

相別不花久廢怨望至是頗快意文宗入大都別不花遂言倒刺沙私回回人哈哈的之罪帝樂其言尋以左丞相兼知樞密院事旋加太保落知院未幾坐矯制以平章政事買閭家貲賜速速罷相天祿二年御史言別不花既得罪又復與速速潛呼日者推測聖算宜竄諸海島以杜姦萌詔竝其妻子置之集慶居久之復起平章江浙政事後至元四年漳州李志甫反命總督浙閩江西廣東軍討之不能克終江浙左丞相

速速畏吾兒氏族也父潔實彌兒官宣政使贈太師齊國公諡文忠速速累官至參知政事至治二年進左丞尋出為湖廣右丞泰定時為御史中丞坐職失官燕鐵木兒舉事推為左丞文宗入大都進平章政事兼太師院使命董度支芻粟又領儲慶司事未幾復坐妄受買閭家貲村徙襄陽詔以母老留之京師尋命仍徙湖

廣至順元年御史言速速專肆貪淫兩經杖斷蒙恩量徙尙不畏法攜妻聚妾濫汙百端湖廣屯兵重鎮豈宜居此詔永竄雷州湖廣遣人械送明年復坐有怨言刑部議當死會赦免詔籍其家禁錮終身

塔失海牙亦曰塔赤海才失其氏族成宗時奉使宣撫山北遼東累官平章江浙政事武宗初召入平章政事出為河南平章政事皇慶元年召為御史大夫英宗初復平章政事至治三年坐賊杖免泰定中起為太子詹事燕鐵木兒舉事推仍平章政事文宗即位罷為大司農踰歲拜翰林學士承旨元統二年復為大司農尋為大尉置僚屬商議中書省事後至元三年復平章政事領都水度支二監明年詔右丞相伯顏太保定住平章政事孛羅阿吉刺聚議內廷塔失海牙及右丞鞏卜班參知政事納麟許有壬等聚

議中書是時大權在伯顏塔失海牙備位而已尋復罷爲太尉轉太保薨

王不憐吉台累官至樞密副使泰定二年列將有從諸王征徭者棄軍娶妾致敗王不憐吉台庇之言其有功當遷兵部員外郎宋本駁正之事在本傳俄出參知陝西政事坐事失官燕鐵木兒舉事推仍樞密副使天祿二年四川平章政事囊加台拒命命王不憐吉台代行樞密院也速答兒擊之不憐吉台以親老辭不行後

闕

寒食累官至湖南宣慰使泰定二年奉使宣撫甘肅入朝爲通政使文宗時失其所遷官

張思明字士瞻其先獲嘉人也後徙居輝州思明性穎悟讀書日記千言至元十九年由侍儀司舍人歷臺省掾阿合馬旣死命尙

書簿問遺孽一日帝召右丞何榮祖左丞馬紹盡輸其賦以入思

明抱牘從日已昏命讀之至旦帝聽之忘疲曰何音之似侍儀舍

人也榮祖對曰此張思明正由舍人遷者也帝由是奇之明日擢

大都路治中思明以其超遷固辭乃以爲湖廣行省都事累遷戶

部尙書延祐元年參議中書省事三年遂參知政事是時浮屠妙

總統方有寵敕中書官其弟五品思明執不可帝大怒切責之對

曰選法天下公器徑路一開來者雜選故甯違旨獲戾不忍隳祖

宗成法使四方得窺陛下淺深也帝心然其言而業已許其人乃

曰卿可姑與之後勿爲例乃以爲萬億庫提舉不與散官思明爲

人巧猾善宦惟知帝本明主能聽言不可徒默默故論事頗持法

不回冀結主知而近臣疾其沽直日言於帝遂罷爲工部尙書然

帝益不忘之嘗問左右張士瞻得無缺望乎因授宣政院副使五

年除西京宣慰使嶺北戍士多貧者歲凶相挺為變思明靖之因  
 疏和林運糧不便十一事帝勞以端硯上尊先是鐵木迭兒恃皇  
 太后恩寵為太師右丞相思明實附之常為之計畫帝不知也至  
 是鐵木迭兒已論罷而左丞相阿散亦黨於鐵木迭兒常思引思  
 明以為之助會阿散辭職帝詰之曰朕任卿未專耶對曰非也近  
 臣有撓政者乎曰無有也然則何為而辭對曰臣自揆才薄若欲  
 任臣必得一人為助帝問為誰對曰張思明也帝曰此朕能從汝  
 即日復拜參知政事比召至車駕幸上都見於道慰勉之曰卿向  
 不負朕注委故朕用阿散言起汝也思明在中書數月而帝崩英  
 宗宅憂鐵木迭兒復相即以思明為左丞鐵木迭兒方日尋舊怨  
 誅大臣不附已者思明心敏慧乃進言曰山陵甫畢新君未立丞  
 相恣行殺戮國人將謂陰有不臣之心萬一諸王駙馬疑而不至

將若之何不可不熟慮也鐵木迭兒為之少止尋帝即位以拜住  
 為左丞相實惡鐵木迭兒而疏之思明為鐵木迭兒百計圖傾拜  
 住會拜住乞假出都門鐵木迭兒欲入省泄事帝使人止之不令  
 入時歲已終在京倉漕管庫之職例應注代思明因以稱疾不至  
 中書眾因此皆顧望俄而拜住至謂僚屬曰左丞病省事遂廢乎  
 因遣人善慰思明思明不得已乃出與拜住共畢銓事明年拜住  
 奏召思明詣上都數其罪杖而逐之遂廢於家致和元年文宗入  
 大都諸沈廢怨懟者多從之遂起思明為江浙左丞天祿二年復  
 召為中書左丞入覲慈仁殿思明為帝敷陳累朝任賢使能治國  
 足民之道帝亦善之已而御史言思明在仁宗時阿附鐵木迭兒  
 開謀兩宮英宗之世又以鐵木迭兒之力引為左丞稔惡被廢今  
 又冒居是官宜從黜斥詔罷之後至元三年卒思明黨邪害正獲

元書 卷之十四 六  
罪天下究亦不免三黜然知學有才能尤明於律與謝讓曹鼎新同稱三絕惟用心詭秘能竝爲諛直又能不治產不畜財惟聚書三萬七千卷邀譽於世人莫能測其隱曲焉後贈推忠翊治守義功臣仍左丞上護軍清河郡侯益貞敏益猶錄其拏附文宗之功以爲守義也

阿禮海身亦曰阿卜海身畏吾兒氏族也父脫烈爲集賢大學士加大司徒兄野訥事仁宗於潛邸從至懷州仁宗之靖內難野訥亦密贊成其議武宗卽位擢祕書監賜玉帶仁宗爲皇太子兼右庶子及卽位野訥請召文武老臣咨以朝政又請以中都苑囿還民拜樞密副使進同知樞密院事命平章政事辭不拜卒贈推誠保節翊運功臣金紫光祿大夫行省左丞相上柱國趙國公諡忠靖阿禮海身亦早事武宗仁宗爲宿衛與父兄竝見信任敖翔華

近自參議省事進參知政事歷左右丞平章政事出歷湖廣江浙河南陝西平章政事沐人尤懷思之泰定時入朝拜翰林學士承旨丁父憂去官致和元年文宗自江陵入大都阿禮海身易服南迎至於沐郊見焉卽命復鎮沐省是時河南平章政事伯顏帥師從文宗北行阿禮海身繼之陝西義軍已鼓行而東河南軍惟萬戶孛羅守潼關士馬旣單弱又乏軍實阿禮海身乃高價糴民粟以峙糧儲令近郡分治戎器閱士卒括民馬俄而靖安王闊不花破潼關進奪陝州阿禮海身集省憲官屬計事無有言者阿禮海身曰沐在南北之交使西人得至此則江南三省之道不通於畿甸矣夫事有緩急輕重今重莫如足兵急莫如足食吾徵湖廣之平陽保定兩翼軍與吾省之礮弩手諸軍以備虎牢裕鄧兩萬戶之軍以備武關荆子口以屬郡之兵及蒙古兩都萬戶左右兩衛

諸部丁壯之可入軍者給馬乘資裝立行伍以次備諸隘召還襄鄧軍之屯田芍陂者益以壯丁使守襄陽白土峽州別遣塔海以備巴蜀之兵給以荆襄汴汝兩淮之馬府庫不足則命郡縣假諸殷富之家安豐等郡之粟泝黃河運至於陝羅諸近郡者則運諸滎陽以達於虎牢吾與諸君各奮忠義以從王事宜無不濟者眾曰唯命即日部分行事自卜顏不花王以下凡省之屬吏與有官而家居者各授以事而出廉訪使董守中僉事沙沙駐南陽右丞脫帖木兒廉訪使卜顏駐虎牢分遣兵馬以聽調用餽餉之行千里相望大都時又置行樞密院以總西事及襄漢荆湖河南皆缺官阿禮海身便宜隨才處之後以上聞焉然義軍勢益盛阿禮海身更督餉西行師及靖安王之師遇於石渡戰竟日而敗遂失虎牢喪兵儲甚富行院之師退至汴汴人大恐阿禮海身屢遣使告

大都不得達甚憂之乃親出撫其民然雖危急阿禮海身朝夕出入聲色不動夷然如平時眾賴以安既而義軍逼城百里而近阿禮海身更激厲行院諸將吏整兵南薰門外以行會使者自大都還言齊王已破上都奉寶璽上新天子矣阿禮海身乃置酒高會於省堂以賀發書告屬郡及江南未幾義師亦退阿禮海身乃解嚴報捷斂餘財以還民以功遷西臺御史大夫召入平章政事尋爲太禧宗禋使復平章政事詔河南立阿禮海身政績碑焉元統時出爲河南左丞相徙江浙薨阿禮海身喜聚書畫薨後太師伯顏欲之帝命盡賜伯顏其時戰燕東西及其北皆燕鐵木兒躬履行陣獨擅其功諸行省惟河南當軍鋒故阿禮海身以是顯名然上都再十日堅守則河南下矣是時與贊畫者有韓若愚其他將別爲軍者復有也速迭兒也先捏脫脫木兒也速迭兒已附其父

阿刺罕傳

韓若愚字希賢保定滿城人也初爲武衛府史歷遷中書左司都事時監燒昏鈔者欲取能名輒曰所燒鈔僞也鈔使管庫者誣服獄既具若愚知其冤覆之得免死者十餘人遷刑部郎中提舉諸路寶鈔庫移吏部郎中仁宗卽位故事凡潛邸官吏不次遷轉若愚以歲月定其資品遂著爲令皇慶元年三徙爲中書左司郎中時議禁民田獵犯者抵死若愚曰昔齊宣王之囿方四十里殺其麋鹿者如殺人之罪孟子非之遂輕其刑頃之命參議中書省事鐵木迭兒爲丞相以愛憎進退百官恨若愚不附己羅織以事帝知其枉不聽拜戶部尙書延祐六年慮囚河間各得其情復還中書參議無何鐵木迭兒復相以舊恨欲誣殺之英宗亦不從猶除名還鄉里泰定初命復其官五遷爲侍御史而丞相倒刺沙擅威

福以事誣侍御史亦憐眞班下樞密獄無敢言者若愚以計奏倒刺沙爲御史大夫事遂解三年出爲河南左丞會文宗自江陵闕入京師道汴梁平章政事伯顏先已通燕鐵木兒密謀卽日迎附而若愚爲之策畫中機由是參知政事脫別台殉難若愚以定策功見嘉進資政大夫至順元年遷淮西江北道廉訪使卒贈資德大夫江浙左丞上護軍南陽郡公諡曰貞肅

也先捏泰定時爲殊祥院使懷王居建康命也先捏掌其衛士致和元年也先捏私至上都與倒刺沙圖傾懷王於是乃復遷懷王於江陵懷王不知其端發自也先捏也及據大位以也先捏爲宣徽使遣之將兵以禦上都之師未幾汝甯王忽刺台破紫荆關關潰卒皆南走遂大掠保定間萬戶張景武及同知路事阿里沙率民持挺擊殺數百人景武故平章政事張珪子也事在珪傳是時

也先捏方以軍至保定遂殺阿里沙及景武兄弟五人竝奪其貲  
尋以也先捏知行樞密院事更遣也先捏與也速迭兒及行院副  
使章吉竝將兵而西復以張珪女賜也先捏也先捏軍至順德命  
括廣平大名馬以利其行然也先捏實觀望懷兩端靖安王闕不  
花破潼關進克虎牢河南幾卽破其平章政事阿禮海牙騰章告  
急也先捏留不遣也旣而河南事平也先捏復以軍至武安西臺  
御史大夫也先帖木兒降詔行院罷兵還而也先捏姦狀亦露御  
史復上言也先捏將兵所至擅殺官吏俘掠貨財詔刑部鞠之籍  
其家杖流南甯明年竟論以不忠不敬誅死

脫脫木兒爲阿速衛指揮使致和元年文宗未入大都天下方戴  
天順爲君上都兵勢亦盛脫脫木兒首以其軍請附大都燕鐵木  
兒遣之守古北口尋與諸王失刺平章政事乃馬歹太子詹事乞

赤戰於宜興斬乞赤禽乃馬歹送諸燕鐵木兒殺之失刺敗走文  
宗遣使卽軍中賜之銀以給軍士有功者拜同知樞密院事未幾  
平章政事禿滿迭兒以遼東之師至薊州脫脫木兒與戰於兩家  
店俄文宗卽位脫脫木兒復與禿滿迭兒戰於檀子山三戰敗之  
旣而汝甯王忽刺台兵入紫荆關勢銳甚脫脫木兒帥師四千往  
援關而汝甯王兵已越涿州進逼大都南城燕鐵木兒拒戰於郊  
忽刺台傷退據盧溝橋而宿脫脫木兒及章吉也先捏合擊其軍  
於良鄉轉戰至橋南以斷其後於是汝甯王遂敗去進知樞密院  
事至順元年脫脫木兒與知樞密院事闊徹伯等十二人以燕鐵  
木兒弑明宗欲謀誅之事泄爲燕鐵木兒所殺籍其家

孛朮魯朮字子暈其先隆安人祖德從憲宗南征因家內鄉封南  
陽郡侯父居謙辟掾江西以家自隨生朮贛江舟中釜鳴者三眾

皆異之長從京兆蕭剡學姚燧見而器之以書抵剡曰僕閱人多矣學問文章無足與子輩比者也於是剡以女妻之武宗初載用薦授襄陽教諭遷汴梁路學正會修世祖實錄燧首薦剡授翰林國史編修延祐中拜監察御史時英宗爲皇太子未出閣剡言宜擇正人以資輔導帝甚嘉之尋劾中書參議元明善帝初怒不納明日乃命改明善官而傳旨諭慰剡巡按遼陽有旨給以弓矢環刀後因爲定制還往淮東覈憲司聲蹟淮東憲官惟尙刑多置獄具剡曰國家立風紀蓋將肅清天下初不尙刑也取其獄具焚之時有旨凡以吏進者降二等從七品以上不得用剡曰科舉先未設人才多以吏進若一概屈抑恐非天下之平也請止於五品從之遂著爲令除右司都事英宗諒陰丞相鐵木迭兒以私怨專殺剡因避去頃之擢翰林修撰又改左司都事於是拜住爲左丞相

使人勞剡強爲起會國子監隸中書俾剡兼領之帝獵柳林駐故丞相東平王安童碑所因獻駐蹕頌命坐賜飲上尊拜住問問剡曰爾堪宰相乎對曰宰相不敢當然所學宰相事也夫宰相必福德才量四者皆備也拜住甚服其言轉右司員外郎與修大元通制書成剡爲之序泰定元年遷國子司業三轉僉太常禮儀院事盜竊大廟神主剡請各室增設都監官內外嚴置扃鑰晝夜巡警永爲制又纂修太常集禮書命兼經筵官文宗之入也大臣問以典故剡所建白近漢文故事文宗呼子輩而不名命剡與平章政事溫德亨十人商議大事日夕備顧問宿直東廡下文宗虛大位以俟明宗剡極言大兄遠在朔漠宜且攝位以俟其至從之及親祀天地宗廟社稷剡爲禮儀使詳記行禮節文於笏至尊不敢直書則圈以識之文宗取笏視曰此爲皇帝字乎因大笑竣事上

天曆大慶詩命藏之奎章閣擢陝西漢中道廉訪使召僉太禧宗  
禋院兼祇奉神御殿事從幸上都奉敕撰碑稱旨遷集賢學士兼  
國子祭酒舊制弟子員初入學以羊贖所貳之品與羊等舛以古  
者教必有業退必有舍以所準錢二萬餘緡作屋四區以居學者  
諸生積分有六年未及釋褐者舛至皆使就試官之帝師至京師  
詔朝臣皆乘白馬郊迎大臣俯伏進觴帝師不爲動舛舉觴立進  
曰帝師釋迦徒天下僧所師也余孔子徒天下儒所師也請各不  
爲禮帝師笑起立卒飲衆爲之慄然文宗崩舛以皇后命預商大  
政甯宗既卽位大臣有謂赦不可頻行舛曰今上以聖子神孫入  
繼大統當新天下耳目豈可不赦以收怨於新造之君乎乃從舛  
言遷禮部尙書元統二年出參知江浙政事逾年以遷葬歸召爲  
翰林侍講學士以疾不至後至元四年卒贈陝西參知政事南陽

郡公諡曰文靖舛狀貌魁梧學問淹貫文章合古法居國學久論  
者謂自許衡後任師道者耶律有尙及舛而已子遠在忠節傳

虞集字伯生宋丞相允文五世孫也本隆州仁壽人集父汲仕宋  
爲黃岡尉宋亡寓居臨川崇仁與吳澄爲友晚教授潭州於諸生  
得李允魯舛歐陽元而獎進之用薦爲教授以翰林編修官致仕  
集三歲知讀書時汲方避兵嶺外集母楊氏國子祭酒楊文仲女  
也口授集論語孟子左氏傳歐蘇文間輒成誦比還就外傅已盡  
誦諸經矣其夙慧如此集既傳世業又獲從吳澄游由是學大進  
大德初以大臣薦授大都路儒學教授兩除國子助教正諸生臨  
祭殿上失禮罪仁宗時爲太子傳旨勿竟集不顧卒論黜之仁宗  
益賢集及卽位集以助司業吳澄議改學校法澄去集亦以病免  
未幾除太常博士時拜住爲太常禮儀院使數問禮於集張珪趙

世延爲時名宿皆敬禮之適仁宗始興科舉說者謂太平可立致集方遷集賢修撰因會議學校乃上言宜求名師使有所觀感不宜以資格授強加之諸生之士也語在選舉志仁宗甚悅集以爲翰林待制兼國史院編修欲顯擢之會晏駕不及用英宗立拜任爲丞相言於帝而集方居憂遣使求之不獲泰定初除國子司業遷秘書少監俄拜翰林直學士兼國子祭酒集上言京東瀕海地宜大興農田以省漕運事不果行語在食貨志致和元年以集充經筵官其歲帝崩天順帝嗣位文宗據大都而自立使集撰詔告天下曰洪維我太祖皇帝肇造區夏世祖皇帝混一海宇爰立定制以一統緒宗親各受分地無敢覬覦自後成宗武宗仁宗英宗以公天下之心以次相傳至於晉邸具有盟書願守藩服而與賊臣鐵失也先鐵木兒潛通陰謀闇干寶位使英宗不幸罹於大故

朕以叔父順承惟謹於今六年災異迭見權臣倒刺沙兀伯都刺專權自用疏遠動舊廢棄忠良變亂祖宗法度空府庫以私其黨類大行上賓利於立幼顯握國柄用成其姦宗王大臣以宗社之重統緒之正協論推戴屬於眇躬朕以菲德宜俟大兄因讓再三臣庶皇皇已及三月誠懇迫切朕姑從其請謹俟大兄之至以遂朕固讓之心已於致和元年九月十三日卽皇帝位於大明殿其以致和元年爲天祿元年可大赦天下集是時以本職仍兼經筵官帝始建奎章閣以爲奎章閣侍書學士乞郡不許有敕諸兼職不過三免國子祭酒詔修經世大典命集與平章政事趙世延同任總裁俄世安去位集專領焉書成以目疾再乞解職帝亦不許御史中丞趙世延乘閒爲之請言集甚貧又病目幸假外任便醫帝怒曰一虞伯生汝輩不容耶帝欲立子阿剌忒荅刺爲皇太子

而明宗子安歡貼睦爾長乃徙之高麗明年復爲詔告天下言安歡貼睦爾非明宗子亦集之辭也其後安歡貼睦爾立是爲順帝初龔伯璲以才俊爲馬祖常所喜祖常與集善每游揚伯璲於集屬薦之集不許也祖常飲集酒出薦牘求集署集拒之固祖常遂恨集至是順帝召諸老臣議政集在列祖常使人告之曰御史有言集懼遂謝病歸然帝實無意譴集明年則遣使賜以上尊金織文錦召還朝病不行有以彘詔爲言者帝不懌曰此我家事豈由彼書生耶至正八年以疾卒贈江西參知政事護軍仁壽郡公諡文靖集性孝友好接後進能受人直言文章甲一代亦明治術每承顧問於古今政治得失無不盡言始拒馬祖常幾賈禍其後龔伯璲以賊敗殺身世始服其知人惟撰詔醜詆泰定士論病之歐陽元字原功潭州路瀏陽人也幼時母李氏親授孝經論語小學諸書日記數千言八歲能屬文爲諸生虞集父汲亟稱許之以爲他日當與集竝駕也元登元祐二年進士第授平江同知調蕪湖縣尹改尹武岡武岡蠻獠雜處撫字稍乖輒弄兵元至適溪洞相攻殺元卽輕騎造之諸獠曰往官皆以我爲魚肉吾甯死不就質也今歐陽公自來吾屬無枉矣元乃諭以禍福爲理其訟蠻獠遂安召爲國子博士進監丞致和元年遷翰林待制兼國史院編修適是時燕鐵木兒圖立懷王爲功以元領印攝院事而燕鐵木兒常居禁中元亦從之爲參決機務主遠近詞發制詔書檄俄文宗卽位元復上封事多條時政以間時亦多行焉天祿二年初置奎章閣學士院又置藝文監隸焉居此者率清望官也文宗重元乃親署爲藝文少監進大監元統元年改僉太常禮儀院事拜翰林直學士至正後累遷至翰林學士承旨拜官日帝稱快者再三


元書

元以老頻年累章乞休皆不允元陳辭懇切乃授湖廣右丞致仕賜白玉帶給祿終身將行帝復不允十四年汝潁盜起元獻招捕之策千餘言人無能用者十七年將大赦天下宣赴內府元久病不能行丞相傳旨肩輿至延春閣下實異數也是歲卒年八十五帝聞賜賻甚厚贈崇仁昭德推忠守正功臣大司徒柱國楚國公諡曰文元性儉約爲政廉平歷官四十餘年在朝之日殆四之三三任成均兩爲祭酒六入翰林三拜承旨修四朝實錄經世大典宋遼金三史皆與焉三史論贊表奏皆元屬筆屢主文衡兩知貢舉及讀卷官文宗順帝兩朝凡郊廟朝廷雄文大冊播告萬方制詔率多出元元統後金縉上尊之賜更無虛歲海內名山大川釋老之宮王公貴人墓隧之碑皆得元文辭以爲榮焉卬集元皆有著述在藝文志其時在下位與於燕鐵木兒之謀者復有任速哥


任速哥濱州渤海人也襲父官爲右衛千戶速哥爲人倜儻而好爲詭激之行頗以俠名公卿或賢之薦於朝英宗召見命備宿衛出入禁闈已而有南坡之變泰定帝立速哥遂不仕時常痛哭過市見者目以爲狂然速哥意以此動時人而莫之激賞也速哥遂潛爲異圖時御史中丞速速方坐賊失官懷怨望速哥知之乃乘閒請見相與往來密謀廢立以爲鐵失之逆倒刺沙實與聞因概然以復先帝之讐爲言實則以周王懷王可居爲奇貨也適燕鐵木兒亦久萌異志速速以速哥往見徐以說微動之燕鐵木兒初若不省而心契其言亦會帝崩倒刺沙以回回人輔少主大爲蒙古人所疾燕鐵木兒遂構變而立懷王速哥以與翊戴超擢禮部尙書歷官長甯寺卿安豐路壽福府總管終都水使天祿時之修英宗實錄也翰林國史院請具倒刺沙款伏狀議蓋本於速哥也

或曰天祿翰林國史院臣實撰任速哥家傳故入罪秦定以揜其無君之惡也

論曰世延不附鐵木迭兒而附燕鐵木兒御史徒劾思明豈以爲世延賢於思明哉當是時人皆美阿禮海身在河南爲勞昔謝晦之反軍容甚盛輒喟然太息曰恨不以此勤王阿禮海身不同其悵恨而自名忠義以倡僚屬是天卑地尊矣彼拒伯顏甘死竄者將謂之何人也集不於此時投筆以殉而忍誣其死君其去張翥也不天淵乎玗元亦有文名而善附會如此昔孔子言冉有季路弑父與君亦不從也曩嘗駭怪其言蓋觀於世延諸人而後知其難也別不花也先捏之徒何足道哉以皆汲汲因時反覆者也故竝附於篇



元書卷七十



曾相忍

劉澄刊

劉潛

門人曾謙襄校

門人曾士琮詳校

